

3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99

~16
2345
7

廿二

戊戌辨誣錄

卷

月沙集

七



和 16
2345
22-7

月沙先生集卷之二十一

戊戌辨誣錄

初賛畫丁應泰與經理楊鍋有郤公所製也崔
辱國革任還宣廟保留上奏奏公所製也崔
天健齋夫應泰又以築城事構陷本國本國上
奏辨白亦公所製也李扣元翼齋去至戊戌九
月初二日應泰又上叅本搆誣訐捏罔有紀極其狼藉
蓋應泰怒本國救鍋醜試誣訐捏罔有紀極其狼藉
上廷臣議天朝論議甚峻至遣徐給事觀
瀾查問而總督邢玠陳奏丁應泰刺眉剪髮激
變等事宣廟席幕不視事國內震悚羣心究
憤欲死將遣使陳辨奏文朝廷極選一時能
文之士數三人各製以進擇而用之遂用公所
製以兵曹判書李恒福擢拜右相爲上使公以
兵曹參知亦陞嘉善爲副使入北京呈奏
兵部則無尚書蕭大亨招謂使臣曰何來還也
皇上見丁賛畫六奏及海東記略置於香案待
爾國奏反辨久矣使臣對之心物不一
站討

程而來云則尚書曰爾聞極上奏
辨白一刻為急何用方物乎問老清舞方賡等
見奏文及呈文皆點頭稱贊曰好文章明白明
白指奏文中稱祖稱宗一欵曰老實老實旨
無隱朝鮮真是禮義之邦也皇帝覽奏下該
部奉聖旨兵部會同部府九卿科道看議來
說三十九衙門官員會議於東閣公一夜之間
搆草各衙門呈文譯官李彥華字官李海龍
等分寫三十九件翌曉進呈於東閣閣老以下
諸官填咽關庭競相取見大加稱獎遠近聞
者亦爭來瞻寫而去諸官覆議中有伏見朝鮮
國王奏文明白洞快讀之忠肝義膽令人涕淚
涔涔欲下等語及議入皇上卽降明音洞辦
快雪兵部奉旨馬上差人報喜本國先來譯
官亦星夜馳來東征大小將官來賀宣廟皆
稱奏文好文章宣廟卽招先來譯官於差備
門外教曰昨夜二更因萬經理飛報已聞
聖旨予喜甚達夜不寐仍問伎臣安不及還
朝卽引見獎諭特命加階賞賚甚優其後
本國人魯認漂到蘇抗南中士子皆誦此奏曰

朝鮮李某文也崇禎己亥冬至使洪命亨之
行廣寧玉四士予亦書此奏來問公安否云丁
應泰衆奏天朝各衙門議
覆及前後聖旨俱附于下

贊畫丁應泰奏本

贊畫主事丁應泰謹奏爲屬藩奸欺有據賊黨朋謀
已彰事臣恭望天闕叩謝聖恩第未蒙俞允
歸籍而臣八月初九日發遼十三日渡江沿途傳聞
楊鎬死黨及朝鮮君臣黨結楊鎬欺抗皇上具本
保留而朝鮮數年奸欺的據行次夾江中洲臣見豆
黍豐美詢之遼人在道者曰先年朝鮮與遼民爭訟
之都司屢經斷案鮮人不平萬曆二十年令彼國

世居倭戶往招諸島倭奴起兵同犯。天朝等取遼河以東恢復高麗舊土等語臣聞之不勝駭異行次定州臣從役以布數尺換鮮民舊書名海東記略臣按其書對馬島諸郡諸浦或受圖書約歲通倭船互市或受朝鮮米豆至納紬布千匹米五百石寸伊勢守轉達日本國此皆獻納互市之實跡也且國王諸酋使船有定數接待諸使有定例有倭使船大小船夫有定額給廩書有職掌迎送供宴有定議往來道路有程里是朝鮮之與日本諸使殷勤備至矣紬米之說有據而招倭復地之說非虛語矣朝鮮應科人

習三經則詩書春秋也既知春秋大義則當謹奉天王正朔何爲又從日本康正寃正文明等年號大書之小字分書永樂宣德景泰成化紀年于日本紀年之下則是尊奉日本加于天朝遠甚而書又僭稱太祖世祖列聖聖上敢與天朝稱祖尊上等彼二百餘年恭順之義謂何而皇上試以此責問朝鮮彼君臣將何說之辭今朝鮮國王姓諱暴虐臣民沉湎酒色乃敢誘倭入犯愚弄天朝復與楊鎬結黨朋欺天子我皇上寬仁不忍加誅討而天鑒祖靈必奪其魄而斬其後矣然臣于先王宋征諸

臣有深恨焉在昔宋應昌李如松等而今升沉陳效
麻貴等久住朝鮮豈云未見此書未聞此語若產書
緘口卒不爲陛下一言之蓋與朝鮮君臣結交爲
奸網利邀功無人臣心可以無臣心之人而使之禦
外倭分主憂臣知其必不能也

上使啓曰辨誣之外必有許多陳辨應教申欽長於
文辭明白剴切如以申欽爲書狀官則似爲便當
答曰曾見申欽所製咨帖不至太好不必以此人爲
書狀官况奉使在外尤難改易予意今之善於詞命
之文者莫如李廷龜觀其文寫出肺腑曲盡誠懇蘊

籍典重此真能文之士其爲人也亦頗有計卿若以
予言爲不虛或陞副使別爲帶行國事爲重餘不可
計但其人身似有病在卿量處回啓曰頃日臣
與副使洪履祥等論此事欲以李廷龜帶行而臣之
愚意以爲李廷龜方以承文院提調專掌文書之事
故不敢以李廷龜爲請申欽所幹不緊故如是啓
請矣今承上教此實臣等之所願而不敢啓者
也其人雖有病當此時時未顛仆豈可以病爲辭惟
在上裁答曰當身則雖不敢言病若實方病則
萬里之行豈不可問乎陞品副使帶行可矣

翌日 傳曰兵曹叅知李廷龜加資陳 奏副使差
下卽日政工曹叅判擬望 受點以年少驟陞陳疏
乞免則 答曰人君用人豈在於年齡資級此行副
使非卿不可國事甚急卿宜勿辭

丁主事 應泰叅論本國辨誣奏

戊戌

朝鮮國王臣姓諱謹奏爲奉職無狀橫被惡名席藁待
命無地自容懇乞 聖明早加刑章以謝人言仍賜諒
察以雪冤痛事臣竊照臣之於君猶子之於父子雖得
罪於父猶當盡其誠孝開陳情意固不可疑懼蔽隔自
阻於慈愛之天臣待罪藩邦遭遇 聖明過蒙生成涵

育之澤有吁必應無願不遂優恩異渥視同內服慰諭
警飭如父诲子臣安敢以疎遠自外煩瀆爲嫌而不盡
所懷於 君父之前乎况疾痛之極必呼父母人之情
也今臣冤悶不啻疾痛矣臣請大聲長呼一言而死日
者贊畫主事丁應泰以築城一事構臣以不測之語臣
驚惶痛迫已經具本哀籲去訖方西望雪涕慄惕俟
命繼而見本官第三疏誣捏小邦極其狼藉加臣惡名
無所不至一則曰誘倭入犯一則曰愚弄 天朝一則
曰招倭復地一則曰交通倭賊或以爲結黨揚鎬朋欺
天子或以爲副憤求援移禍 天朝嗚呼其亦慘矣是

果人臣所忍言所忍聞者乎臣讀之未終心腸墜裂跼天蹐地罔知所措人臣有一於此萬死猶有餘罪况兼之乎臣既被此名誠不可一日容息於覆載之間唯當早正王法以謝天下第以一死固甘而臣之情事苟或有一毫之未白則生爲逆臣死爲逆鬼窮天極地之痛無以自雪而地下之目亦不得瞑矣夫天高地下君臣位矣子孝臣忠人道立矣自有生民以來便有此道理一日而無此理則人之類滅矣臣雖至愚極陋受天之界猶有性情亦知天之高地之下臣之當忠子之當孝人之所以爲人禽獸之所以爲禽獸其於君臣父子之

道講之素矣自先臣數百年來恪守侯度荐被 皇眷嘗以禮義忠順見稱於 天朝以至於臣雖致寇喪國墜失基業顛沛流離死生危急而拱北之心如水必東區區一節自謂不愧於天下有辭於後世天地鬼神臨之在上質之在傍其可誣乎疏中所論言亦汚口誠不欲掛之齒牙有所陳辨然 君父之前固非妄言之地是非虛實此心難欺有罪無罪 皇鑑在上臣請逐一條陳伏願 聖明哀憐垂察焉謹查日本一種在東瀛之外海道杳茫窟穴險遠此實天地所以區別異類也小邦不幸與之爲隣彼以舟楫爲家寇抄爲事颶風飄

忽往來無常自高麗之季以至小邦之初跳梁侵掠歲爲邊患東南沿海數千里之地廢爲榛莽先臣康獻王力戰殲討僅能勘定而猶未能防其竊發地絕海遠動靜聲息無從訶得對馬一島最近於我其人利我互市來歛南邊遂因其納款許其往來其後日本諸島之倭亦有夤緣求好小邦視之如禽獸待之如蛇虺爲生靈計遂許以關市以中其欲或賜以米穀以悅其心於是又有館待倭奴之例伊勢守之歸賜以紬米壽蘭僧之還付送諭書卽此也至正統年間因其求使嘗遣陪臣申叔舟往日本通諭而來蓋所以驗察彼中情形盛衰強

弱而仍探聽賊情報聞天朝此固有國之所不免而亦天朝之所已知也惟其如是故正統癸亥倭寇上國仍掠小邦濟州爲小邦邊臣所得餘賊遁歸對馬島小邦遣人諭島主掣送遂獻俘于天朝嘉靖癸未倭奴作亂於寧波府殺邊將而走其黨藤原中林等被獲於小邦卽獻俘馘及所搶漢人又於嘉靖癸丑丙辰等年俱獲入犯之倭節次獻俘屢蒙朝廷獎賞此皆小邦爲天朝竭心殫力一面捍禦以遏其鋒一面撫輯以防其釁使醜類畏服不敢生心以弭邊疆之禍以致藩屏之職者也且對馬島倭初請來寓於齊浦金山

浦鹽浦等地以爲互市釣魚之所小邦遂許其來居使之探報賊倭聲息此所以有三浦倭戶之說也然其居住及通行皆有定處不得違越黃綠結幕者商販潛接者事畢後故留者一皆痛禁此則海東記已盡載錄卽小邦鈴束之意亦可以見而其後漸成繁滋至正德庚午三浦之倭作亂殺齋浦僉使李友曾小邦遂遣將勦滅自後絕不許居三浦之無倭戶今已八十九年今乃謂小邦於萬曆二十年令世居倭戶往招諸倭起兵司犯言之不近乃至於此是誰欺者非欺天乎至於海東記略則是乃陪臣申叔舟得倭人所記其國風俗世系

地圖遂因其本藁附以小邦館待倭奴事例作爲一冊名爲海東諸國記蓋小邦與日本聲迹邈然只是來則不拒略爲羈縻之計而已至申叔舟往來之後稍知其國事迹因贍出一編以爲異國奇聞而今乃以覆瓿之斷簡作爲隅人之奇貨據摭流聞捏造虛辭亦已甚矣其所謂年號大書分書之事則尤不足多辨蓋此書只因其國所記而添註故其國僭稱年號之下分註天朝年號以標日本僭稱之某年爲天朝建元之幾年如曰嘉吉元年卽正統六年云者是也大書者本記也分書者添註也加一卽字其意尤明春秋因魯史所作

故大書魯元年其下分註周平王幾年亦可因此而有
疑於尊周之義乎况其國王關白皆書死尊奉者果若
是乎且書中既稱來朝而今乃謂彼此相朝書中既云
賜米而今乃謂鮮人納貢自做臆說以掩其實欲加之
罪其無辭乎於皇聖朝一統萬邦普天率上聲教俱
暨而獨此小醜敢有僭號自帝其國以抗天紀是實
臣子之同讐萬國之共憤况臣最近聖化涵宥殊
恩事謹奉之義天下所知而今欲以不經小說敢眩
天聽聖鑑孔昭豈容誣罔若曰小邦奉日本年號則序
文之末何以揭天朝成化紀元乎此亦不待辨說而

自明矣且其序文則申叔舟第因其書而泛論古昔待
夷之道是不過一文人措語之謬事在百年之前微眇
甚矣而今欲執此爲罪案目之以輕藐中國豈不寃乎
况其書中所謂欺誑真僞變詐百端溪壑之慾無窮少
咈其意便發憤言地絕海隔難審情僞等語卽小邦待
倭之情已自槩見至於稱祖一事則小邦海外荒僻自
三國以來禮義名號慕倣中朝多有侔擬至我先臣
康獻王凡有干犯者一切釐正以至微細節目亦未嘗
不謹以爲上下截然之分傳之子孫守如金石而獨其
稱號則自新羅高麗有此謬誤蓋以臣民襲舊承訛猥

加尊稱相沿而不知改此實無知妄作之罪以此受罪
臣雖萬死固無所辭若謂之僭則非其情也小邦自先
臣以來血心事上盡禮盡誠律用大明律曆用大統
曆服色禮儀無不慕尚而天使之來有迎詔儀陪
臣之去有拜表禮正至聖節有望闕之禮率皆虔
心精白肅敬將事一如對越天威是皆祖先相傳之
制而毫髮不敢怠忽者也以至閭閻下賤三尺孩童纔
辨一語便知天朝未解隻字先習正朔各樣文券
公私簡牘皆奉年號習爲恒式此蓋常經通義撐柱宇
宙不以內外而有間無論智愚而皆知者也豈敢以區

區一號自陷於僭上之憲哉况茲者天朝之視小邦
如一家小邦書籍如國乘稗說多入於中國小邦事
迹班班可見且兵興七年之間大小衙門及各營將領
往來軍兵及買賣商賈項背相望表裏無間小邦所爲
纖芥難掩情意交孚萬里咫尺臣安敢以有爲無自陷
欺罔之誅哉若所謂夾江中洲者與小邦義州只隔一
水水合之後漫爲平地彼此人民交通買賣恐惹起事
端故嘉靖年間移咨都司或奏聞朝廷將冒耕等處
盡行拋荒至於立碑禁約事之顛末不過如此小邦自
有分土天朝亦有定制疆場之事小邦固當慎守其

一而一聽處分寧有彼疆此界互相爭占之理只欲禁革住種以防混處惹事之患而已小邦不曾與遼民爭訟而乃云爭訟都司不曾以此事斷案而却說斷案至曰招倭同犯奪取遼河以東恢復舊土言之罔極至於是乎最所冤痛者辛卯之春賊酋秀吉篡君稔惡陰懷異圖遣使致書以探虛實脅以同逆要以假道言辭完慘非臣子所可聞臣拒以大義斥絕其使卽具奏馳聞事迹昭然今不必再有煩辨逮至壬辰賊遂空國而來殘臣八路覆臣三都夷臣二墓火臣五廟蹂躪長驅悉甲以西是其射天之計固非一日而蓄謀歲兌乘

時而發其視小邦特是一癡臣於是時既不能力抗完鋒死守封疆而匹馬蒼黃狼狽西陲初豈有一毫圖存之念哉只欲歸死於父母之疆耳古今天下寧有引賊入內自覆其國而爭地於君父之邦者哉臣雖無狀亦不至於狂惑喪心求之於理近乎否乎若然皇上緣何發十萬兵以援犯上之屬國小邦緣何竭七年力以戰自招之倭賊以此以彼俱無所據是不過徒欲誣臣而自不覺其言之虛妄也然臣之得此於贊畫者亦有其由臣頃於楊鎬之去抗奏保留論議相左激而至此然臣之意則只以楊鎬又在小邦一心討賊小

邦之人方倚此而成功一朝受枉邊機將誤却恐大事漸跌他議或間懇乞專任以畢天討是臣區區保無他意臣失職辜恩方俟嚴譴尚安敢結黨朋欺以重臣罪且贊畫東來亦膺帝命再疏三疏籌度何事督撫按鎮殆盡一網東征將士之專意主戰者皆被詆斥且懼東事之幸完務壞諸人之成績使軍情疑沮諸將解體無復有激勵奮發之志其主意所在盖可知也卽小邦滅亡已不足言而竊恐天下大事自此去矣臣東藩之外臣也迹不入於朝無毫髮之援所恃者吾君也只恐天日之照未及於覆盆而慈母之杼或投

於三至也臣旣至此生不如死惟此一心炳然如丹雖萬被汚穢亦可以無愧於中第所自憐者臣守義拒賊矢死不變罹此喪敗而終以引賊反君受誣臣謹奉天朝一遵法制而終以不奉正朔受誣臣期滅讐賊義不共戴而終以交通倭賊受誣臣竭誠據忠開陳無隱而終以結黨朋欺受誣使先臣二百年事上之誠至于臣身而都喪環東土數千里淪爲禽獸之區是臣不惟獲戾於聖明而又得罪於倫紀爲萬世之罪人得罪於祖先爲一家之罪人得罪於臣民爲一國之罪人縱使讐賊盡滅疆土盡復惡名在身持此安歸伏

願聖明天地父母曲察微臣痛迫之懇將臣所奏
特下公庭另行查辦事果是實亟正臣罪以肅王
法如係冤枉亟賜昭雪俾臣得以自立於天壤之間
則臣雖死之日猶生之年情隘辭嚴言不知裁臣無任
瞻天望聖痛泣哽塞之至爲此謹具奏聞

呈文

呈徐給事文

朝鮮國議政府領議政柳成龍等謹呈爲仰陳實狀冀
賜昭察事小邦不幸天篤降割兵禍之慘至于七年而
靡定幸賴聖天子惻然哀憐動天下兵不以爲擾犒

銀餽糧不以爲費終始拯濟再與生成使東方百萬生
靈免爲魚肉以至于今天威烜赫寰宇震動重臣總
戎臺憲按節催兵督餉冠蓋相望師期指日偉績垂集
小邦臣民方感戴洪恩拭目盛舉不期撫院楊爺受
任未畢遽爾回籍小邦之人徊徨冤愍無所控訴職等
請粗陳實狀上年倭賊蓄銳潛師襲破閑山悉兵急攻
繼陷南原全州以北次第潰裂兜鋒豕突遍滿三路長
驅之勢迫于漢南都城洶懼莫保朝夕惟時撫院楊爺
自平壤單車疾馳冒入危城申飭諸將慰諭餘氓談笑
雍容人心自固憲撥精銳摧遏賊兵一捷於稷山而京

城全再蹙於青山而湖甸完賊遂褫魄喪膽狼狽而逃此蓋人所難爲而小邦之得有今日皆其力也及督府邢爺進劄城中指授方略監軍陳爺按節督戰撫院以文職大官擁兵南下被堅執銳深蹂戎馬之地暴露虎穴過十三晝夜砲丸如雨矢石交前而堅坐不動爲士卒倡唇焦面黑督戰益懇遂焚燒內外柴柵斬獲千餘首級使賊首清正窮蹙乞款渴餒樂死此蓋曠世之奇功而不幸天時不助雨雪連日士卒凍傷軍容漸疲兜援外添賊備內固將有腹背受敵之患不得已相機麾師身自爲殿其英聲義氣在人耳目邊上軍民至于今

感歎咨嗟自是兇賊畏威邊民鼓氣是其一戰之功未必非再造之基其謂之不能全勝則是矣謂之喪師則千萬不然天日在上豈敢虛妄惟是撫院銳意討賊一力擔當盡瘁忘私不避艱險任怨敢爲束下甚嚴各營官兵歛手縮氣遵奉約束不敢科擾發號施令之際豈無一二不便於其心者哉遂至造作飛語轉展流聞至於上徹天聰大局將結中道革回督府監軍兩爺又不免情外之言此小邦大小臣民所以含冤茹痛直欲顛天而無從也茲者老爺親擎綸音遠履荒域霜威所及無不振肅既以會勘爲往是非虛實自應不逃於

明鑑而小邦羣情不得不陳伏願老爺留心傾採將小
邦閼迫之憤轉奏 天陞使當事効勞之臣得申橫誣
不勝幸甚

百官呈監軍御史陳效文

戊戌九月

朝鮮國領敦寧府事李山海等呈爲痛陳悶迫危憤冀
賜昭雪橫誣事職等竊聞丁主事題 奏一本醜詆小
邦加以惡名有非人臣所可忍聞職等驚慌失措心膽
墜裂直欲顛 天而無從也職等俱以庸瑣當國家危
亡之日不能捐身殺賊忍與君父之讐同戴一天敗國
亡家偷生至此揆之大義死有餘責而獨其所恃而自

立得免爲禽獸夷狄之歸者只是君臣倫紀出於恒性
有不容泯滅而一朝蒙此惡名是舉國臣民俱入於無
父無君之域職等誠欲躡穿奔走號哭於 軒陛之下
而 天門萬里無路自達職等請披肝瀝血痛陳情事
先伏斧鉞之誅於行臺以謝人言小邦雖極僻陋世被
列聖東漸之化其於君臣父子禮義廉耻臣之當忠子
之當孝不待智愚而皆知之是蓋得之父師之遺風得
之天性之固有初非有待於作爲也寡君之莅國今三
十餘年自受 命以來恒懼不克負荷以貽 皇上之
憂勤精學問銳意治務弋獵遊畋之娛鐘鼓聲色之玩

一切不經於心而其憂勤惕厲夙夜不遑者一則
大二則勤民遭際 休明蒙被 皇眷沾太平之餘波
席累葉之無事恬嬉既久民不知兵壬辰之初賊首秀
吉陰謀射 天脅以假道寡君據義斥絕陳 奏情狀
遂爲狂賊所迫顛覆至此而區區一節如水之萬折而
必東雖流離懸遠顛沛危迫之際自守益堅之死不悔
血誠呼籲只欲歸死於父母之邦此則可以有辭於
天下而其情誠可悲也天地鬼神所共鑑臨其可誣乎
忠悃上徹 天心感悟嘉其效節無貳憫其播棲莫振
調兵發餉終始拯援扶植生成以至于今自惟小邦何

以得此於 天朝寡君常晨夜雪涕感戴 洪恩恒以
爲祖先數百年來血誠事上之效於今著矣其所以竭
忠圖報者益自砥礪于心而惟是時勢艱難羣臣鄙劣
不能自強恢拓使寡君貽憂於 聖朝前後 嚴旨教
戒丁寧或責之以衰微或警之以弛廢此皆職等之罪
而至於臣節一事則亦未嘗見疑於 天朝也頃以撫
院楊爺擔當東事一心討賊旣撫定遺民於崩潰之際
又摧破賊鋒於猖獗之時而且調集兵糧以圖再舉小
邦之人方倚此而成功一朝革回軍民失望邊議未定
大事將誤寡君爲是懼將一國人情數 奏保留兼陳

危懲情形以冀亟行 天討是特報功之公議討賊之大義何嘗有一毫私意於其間哉不然則求媚於已去之經理觸忤於方臨之贊畫輕犯羣議之鋒自陷朋欺之罪天下寧有是理曾不料因此一事受此寃痛之誣使小邦君臣上下遑遑悶迫若無所歸咸欲剖心輸肝以雪危衷而不可得曾謂 天朝有如此議論乎小邦與日本隔海對壤自麗季及于國初跳梁竊發侵掠無常東南之民不得安枕小邦既不幸與此賊爲隣雖以兵力防守猶未能遏其鴟張則間有因其往來求款或許以關市以中其慾或賜以米穀以悅其心因探聽賊

情報聞 天朝羈縻不絕爲生民計此固有國之所不免而亦 天朝之所知也惟其如是故凡倭賊入小動靜小邦無不節次陳 聞在嘉靖年倭犯浙江小邦截殺於海中馳獻俘級前後非一屢蒙 朝廷獎賞此皆小邦數百年來憑藉 皇靈竭力殫心一以禦禦一以輯寧以粗效藩屏之職要使完心少戢邊境稍安而聖朝東顧之憂亦或因此而小紓今所謂海東記略者小邦當成化年間有陪臣申叔舟得日本倭僧所記其國風俗世系地圖一本遂因其本稿附以小邦接待倭奴事例作爲一冊名爲海東諸國記以備異聞其書之

出已過百年職等有未詳記而况小邦敬事天朝之誠天朝一統萬邦之義昭如日星天下所知而顧以荒僻無據之說亂之至於因其書來朝之語而指爲相朝因其書賜米之語而指爲納貢創出臆斷捏飾虛辭欲加之罪其無辭乎此小邦臣民之所以痛心疾首不如無生者也小邦本欲倚仗皇威剪滅仇讐以申區區之義而今乃得覆載不容之惡名是則討賊爲外物亡國亦餘事皇鑑在上想已洞燭寡君忠赤自應暴白而臣子之心爲如何哉寡君自聞此言跼天蹐地如果不自容屢下哀痛之書殆有不忍讀者舉國人心無不

驚駭遠近遑遑若將崩潰悲夫深讐未復極痛在身而意外冤枉至於如此天乎天乎此誠何事伏惟老爺按臨小邦亦旣有日小邦情事無不曲察小邦其果誘倭入犯乎其果愚弄中國乎其果交通倭賊乎其果結黨乎其果姦欺乎天鑑孔昭十目難掩職等幅塞填冒言不知裁主辱臣死義固當然雖斧鉞在前敢有二辭老爺秉公持正三軍敬服東民薰德拭目風彩今日小邦百萬生靈之命脉俱係老爺伏願老爺俯察情悃痛雪污穢轉奏天聰亟定公論俾小邦得以自立於天日之下千萬懇祝之至擬合呈稟爲此合行具呈伏

請照詳轉 奏施行

呈閣老諸衙門文

戊戌冬為陳奏副使在北北京生

謹呈爲懇乞鈞慈曲察危悃轉奏 天聰早賜昭釋特降明旨快雪誣枉事職等費捧國王陳情血奏一本已經進獻訖敢將冤痛悶迫之情仰籲於閣下伏惟閣下試垂採焉竊念人之所以爲人者以其有倫紀也人苟得罪於此則人不能爲人而終於禽獸之歸矣以身則生不如死以國則存不如亡尚何忍容喘息於覆載之間哉小邦不幸酷被兵禍上貽 天朝東顧之憂于今八年矣寡君自以失職罪大恒惴惴不自寧處惟願粉

身糜骨卧薪嘗膽圖滅此賊以效臣節於萬一而橫被惡名至於此極是自殷師肇國以來所未嘗聞者雖在平人殺身不足以自雪况以千乘之君有社稷土地粗知君臣禮義之分而一朝與冠裳生齒胥陷於無父無君之域寡君之心當作如何而爲其臣者又當如何也寡君自遭此誣憂惶震悸無地自容席藁囚服西向待命到今月又年矣近者征東諸位老爺丁寧慰勉曲爲開釋寡君上體 皇上之明命俯察討賊之大義雖抑心強情勉起署事心神飛越志憲焦煎有似水火薰身鋒刃迫膺殆不能忍耐於須臾也以此上下遑遑無不

驚駭羣臣反首拔舍小民相吊於野氣像愁慘若無所歸嗚呼此誠何事小邦積敗衰微不能自強以致前後科評亦或有情外之說 聖恩寬大輒賜伸釋推誠不疑扶護到今有罪無罪 皇鑑孔昭構権雖巧 聖明自應洞燭然人臣既被此名是為極惡大罪之人寡君之心其安敢倖恩而自赦也况今日之誣又非前日之比其百端羅織亦已慘矣情事之顛末備陳於原奏倘蒙下察自可一一立辨今不必再有煩贅最所寃痛者寡君受 命以來憂勤惕慮夜不遑恒懼不克負荷以累 聖天子付畀之重勵精學問勤卹民隱莅國

三十餘年未嘗妄殺一人而弋獵遊畋之娛鐘鼓聲色之玩一切不掛於心卽其所性然也自被兵以來秉心刻苦寢處湫陋減厨膳以補軍餉停例獻以紓民力常叩心灑血圖報 皇恩奔走於 天朝諸將臣之門日不遑暇疾病勞苦未嘗自豫雖軍丁僕隸之微無不致敬盡禮不敢毫有怠忽則 天朝將官軍兵所共目見今乃以沉湎暴虐目之蒼天有知赤心難欺言之罔極乃至是乎然此則寡君以爲累止身上只自省惕不敢仰辨而惟是舉國之人冤痛欲死耳至於所謂通倭犯上等語是果何等罪惡而當蒙何等刑章耶言之者不

可以疑似而妄加聽之者不可以疑似而姑置一被此
名則人臣之義惟有死與辨耳不死則當辨未辨則當
死其烏可苟焉而已哉小邦本緣守義拒賊罹此喪敗
設令終不支撑自此淪沒猶爲死義之鬼此名未雪則
雖快剪深讐盡復全疆終爲叛君之身此寡君之所以
日夜腐心直欲搢冒自列於天陛之下而不可得者
也抑有一說今日之誣小邦是不過執一書爲罪案而
小邦恪事天朝之義是實天下所知不須煩引他事
就其書而證之亦足以明其誣序末揭成化卷尾書弘
治年號是果不奉正朔乎於其遣使也書來朝於其給

糧也書賜米於關伯書死於國俗書變詐書欺誑是果
尊奉日本乎且其本記仍用僭稱年號者只是仍其所
記而爲之編次故書之凡例有曰日本紀用其年號琉
球紀用中國年號云者卽其義已昭昭矣是果奉日
本年號而然乎其書已經一贊畫呈進試取而考之立
可辨也况燒夷廟社魚肉生靈八年以來抗賊者何事
而今反謂之誘倭同犯閭下亦旣博觀前史古今天下
寧有是乎小邦之人雖蒼痍溝壑朝夕死亡而唯是君
親倫紀炳然不昧咸欲憑仗皇靈剪滅仇讐以伸區
區之義而今遽陷於惡逆之坑不惟小邦情事誠可哀

憐抑 天朝七年拯濟之大恩終歸於保護叛逆之區
豈不痛哉職等之來也寡君涕泣拜 奏瞻天踧踖只
待 聖旨以決死生倘不得快雪此寃則職等誠不忍
生渡鴨水歸見寡君也不泯者天理難誣者公議幸惟
閣下以仁人在高位匹夫不獲思有以濟之今日舉國
之含冤非特一夫之不獲則恢公議洗積誣亦非度外
事職等躡穿西來割心呌冤以冀大人君子之動心非
閣下將誰望顧以槐閣深嚴閭人有戒遐邦賤蹤無路
得溷於軒陛之前徊惶踧踖蓋有日矣今幸路左仰瞻
袞烏茲敢不揆僭越大聲長呼事實可駭而情則戚矣

伏望閣下曲察寡君原奏俯諒敝邦事情善為敷奏特
降 明勅昭回雲漢快賜伸雪使東韓百萬生靈復見
天日之光一以昭釋前疑一以激勵後效則專力結草
死猶生矣情隘而不能盡言嗚懇而不暇擇聲伏惟閣
下哀憐垂察焉職等不勝嗚咽痛迫之至伏請照詳轉
奏明降施行

呈兵部文

謹呈為仰荷恩慈曲許昭察懇乞轉奏快降 明勅以
慰舉國人心事卑職等冤痛悶迫之極不揆事體昨於
公庭之會唐突呼籲干冒威嚴罪固難逭伏蒙老爺不

以僭越為罪虛襟開納溫語慰撫卑職等相與涕泣感歎曰我皇上明見萬里在廷諸老爺開誠秉公又皆如此今既命下公庭博收諸議天下之公是非自應不逃於明鑑小邦之深冤極痛必得快雪於今日退伏館舍叩首俟命第有一事不得不更煩於大部小邦冤痛之情則寡君之原奏下矣咨文進矣職等之籲疏呈矣遑遑汲汲之狀槩已申煩矣譬如身在水火中者之不能自拔而求濟於人今既大聲哀鳴矣老爺亦旣聞而知之矣不審老爺於此其或真知其冤枉悶迫而真有所動心否乎如果真知其冤而真有所動心則其

所以惻然哀憐思有以湔洗拯拔者宜無所不用其極上年小邦亦被科叅抗奏陳辨其時聖恩卽許伸雪而大部奉旨移咨片言隻字皆出皇恩寡君則雖極感泣而舉國之心猶有所不釋然者何者咨文則獨寡君與該管陪臣知之不可家諭戶說至於聖勅之降則寡君躬率百僚肅迎郊外一札雲章天涯遠暢大小臣民快覩爭先積誣舊汚咸與維新是則咨會之與勅諭在天朝無甚輕重而於小邦遠近瞻聆所係極大况今日之誣視上年不啻萬萬者乎寡君與一國之人俱在覆盆以職等之歸為再生之期喁喁懸待日

復日矣今者倘或依例議下泛然咨會以一紙該部之文歸報於寡君則其何以洗覆載難容之惡名而雪舉國窮天之冤痛乎惟我皇上念小邦忠順不憚動天下兵又不惜費八年力以再奠小邦於覆亡之後其何惜一言開諭忍使二百年忠勤之屬藩終於禽獸之歸也惟在大部稟覆之如何耳仰惟老爺旣已亟稱其冤矣又能明知其誣矣伏望善為敷奏特降明勅使一國之人快釋羣疑欣欣然咸有更生之心則皇上如天之仁覆冒海隅而老爺義聲垂於不朽豈不幸甚一辱臣死義固當然瀆擾之誅卽所甘心伏惟老爺哀其

情而恕其僭職等不勝哽塞懇迫之至伏請照詳轉奏明降施行

附 皇朝覆題

皇朝兵部等衙門尚書官蕭大亨等謹

題為奉職無狀橫被惡名席藁待命無地自容懇乞聖明早加刑章以謝人言仍賜諒察以雪冤痛事兵科抄出朝鮮國王姓諱奏前事等因奉聖旨兵部會同府部九卿科道看議了來說欽此欽遵除各衙門註籍諸臣不到外臣等遵奉明旨于本月初五日齊赴東闕臣等會同看朝鮮該國是否通倭

應勘與否煩各出一草直書簡明數語以便入疏具
覆謹此啓知 後府都督掌府事徐文璧 右府都
督僉事彰武伯楊世階 中部掌府事靖遠伯王學
禮 戶部尚書楊俊民 通政司使范嵩 大理寺
卿甘士玠 刑部右侍郎董裕等揭稱朝鮮為國家
東藩夙稱恭順其國隣倭因與倭互市亦非一日乃
其傾心內嚮不假道于倭准納欵 天朝者則其忠
之可尚者也 皇上悶其失國為興十萬之師長征
萬里之外不惜百里之餉而焦勞七年之久是恤
小之至仁 帝王之義舉也今倭奴三路奔竄金山

一倭不留使朝鮮無國而有國古稱跨海東征揚威
萬里外者莫盛今日而自樹藩屏使朝鮮為海上長
城者抑莫盛于今日而自軍興以朝鮮通國軍民繕
兵給餉無敢告勞告匱者誠真心仇倭而委命天
朝亦自可見安得以通倭引倭疑而罪之哉夫國家
于朝鮮既憫其窮而救之恤之復疑其貳而外之仇
之為德不終而自撤外屏亦非 帝王以至誠待夷
狄之道也所據朝鮮奏辨通倭等情委有可諒似應
免勘庶 國是大明而夷情亦少安也 工部尚書
楊一魁等揭稱朝鮮國王姓諱自來忠順適遭倭寇

變亂滿望我朝主戰保全斷無誘倭迎倭之事據奏
辨之辭忠所義膽天理人情無纖毫可疑橫被口語
凡有識者皆知其寃咸欲伸理 聖明在上不待勘
而自明也 禮部左侍郎余繼登等看得凡藉寇兵
必有所利為之也 倭入朝鮮破其國都虜其王子毀
其宗廟虐劉人民走其君臣為禍慘天彼何所利而
招之使來也 或畏其威而不敢絕其使命此未可知
略曰爭一洲而破一國此事理之必無不待辨而明
者 朝廷恤小不愛士馬之力轉輸之費今倭始退
國始安彼方切感激何可令頓生疑畏此不必勘亦

無可勘者 都察院左都御史溫純等揭稱勘科徐
疏稱朝鮮通倭事委不必勘則其說已與衆論合矣
似應免勘以終 大朝字小之仁以釋屬國疑畏之
慮 奉議大夫吏部都給事中趙完璧等揭稱朝鮮
之不必勘言者屢矣今觀其疏辭甚明其情甚悲矧
聖明勞七年之士馬費百萬之帑金方全一屬國而
卽寘之刑章字小之謂何恐天下後世非所以為史
冊榮也 勘科身在朝鮮公明並用不勘為宜卽此可
棄見矣竊以為今日事不必論虛實總之不勘為便
戶部都給事中包見捷等揭稱朝鮮為冠帶屬國春

秋所治二百年無二自倭奴發亂箕封不絕如綫頃
徵天靈藉聖指文武將吏拮据七載而鐘羞不移
金穴蕩掃可不謂功焉夫虜功旣奏尚亦有議論乎
乃者朝鮮國王姓諱煩冤憤懣不忍為贊畫丁應泰
所汚巖席藁請刑讀其疏涕泗涔涔欲下仰賴聖
明心動下廷臣議愚以為卽微國王疏固知贊畫之
誕也夫情節之著事理之明具在諱疏中卽今勘科
疏揭一則曰屬藩恭順一則曰朝鮮素尚節義一則
曰應泰一時偏見面指其失則涇渭判而筵檻別已
獨旣以田蚕禮義之邦不幸為兵燹所丘墟又不幸

為唇舌所攬搃宜其仰指天俯畫地而割心自明刎
頸以見志也先該部覆免勘無煩再議謂宜請勑
亟叙文武將士之勞苦仍溫諭該國君臣勿以譖
口芥蒂益勵薪膽猶倭寇之在門庭則今日昭雪海
東之誣與曩昔昭雪宗系之亂萬世而下仰見聖
明燠麻屬藩功德甚鉅甚遠而其他善後事宜督撫
諸臣自有借飭之籌茲不伏贅禮科左給事中劉
餘澤等揭稱朝鮮日本相望一衣帶水釜山為市匪
朝伊夕卽邇年迫于憑陵或有如鄭之于楚者然非
臣而貢之也且自倭奴煽惑以來蹂躪其土地虔劉

其人民吳越世仇薪膽苦狀不獨鮮王自勵亦天下所知也 天朝兵援于今七禩恩有所自怨有所歸朝鮮卽至愚詎肯德所怨而負所恩為操戈入室之逆行起開門延盜之拙謀哉丁贊畫歎心劔舌閃爍如電止以鮮王保留舊經理遂加以不韙之名陷以不赦之罪意欲以箕子千秋之祀一旦而斬之此朝鮮君臣所為呼 天鳴冤者 兵科都給事中張輔之等看得朝鮮為 國藩籬餘二百禩其律曆大典一秉 中國若海東紀略迺成化時陪臣申叔舟得之倭人所紀其國世系風俗地圖特就其書加一添

註以著倭奴僭竊反覆之態併寓羈縻之意國王原疏辨之甚明此係百年斷簡不足為今日斷案且勘科徐觀瀾極稱其節義又為 中國不侵不叛之臣今丁應泰祇為助和撓戰之故誣以通倭重情謬悖甚矣幾不至攜屬國之心而撤 中國之藩籬乎是驅朝鮮入于倭而蟄毒於我也此事可忍又何事不可忍免勘為當 兵科給事中桂有根看得朝鮮遵奉 天朝已延數世我 皇上遣兵拯救又歷七年倘有通倭情由數萬口豈不早報 闕下若果通和倭酋則倭亦以屬國字之安忍加兵殘殺至此極耶

此說激於鮮王申救撫臣楊鎬大拂應泰仇恨之意
遂欲併棄朝鮮破壞東事耳故謂倭素與朝鮮市易
則可謂鮮通倭以貽禍國家則非況科臣徐觀瀾久
在彼中極稱不背不叛之邦當此恢復之日正可撫
慰振作永固藩籬豈可無端行勘以增疑懼

刑科

右給事中楊應文等看得朝鮮素稱禮義之邦法用
大明律歲用大統曆方物必獻歲時必至二百年來
竭誠盡忠其不敢愚弄朝廷明甚至倭奴蹂躪七
載夷其祖墓火其宗廟國王父子君臣流離不絕者
僅如綫耳豈有交通倭奴誘其入犯而乃自試於死

亡者或至於海東日紀及爭地等情國王疏中所陳
甚明無容別議大都禍起留楊鎬一疏故贊畫極為
誣詆以洩其忿不知朝廷累世撫綏外邦恩義極
厚七年征兵促餉無慮億萬今仰仗皇上威武倭
奴盡遁累世盤據釜山一旦恢復猥稱熙朝盛事
彼朝鮮所以感戴洪恩當同覆載通倭誘倭萬萬
必無若因睚眦小忿而加以不韙之名非所以終
聖朝字小之仁永堅朝鮮忠順之節也工科都給
事中韓學信等看得反覆朝鮮王疏奏辨白情辭亦
悲且惋矣其國世篤忠貞亦世沐天朝覆露何敢

妄生他念引寇入室以自取喪敗使果與倭通而誘其入也則七年來蹂躪之慘倭宜不忍於鮮而素與香火反致其倒戈之向鮮雖愚不止若此甚也直以疏保經理因而失懼贊畫凡以中之禍者信口捏污而鮮王之冤案成矣第贊畫心死舌存其事之本無而言之妄加也路人盡知之但屬國疑懼理合當割心求明而聖度汪涵自可置腹示誠先是台省各臣曾交疏為鮮而奉旨勘科亦云不侵不叛之邦不必行勘且致恨于贊畫之偏見不難面叱其非也則事之情偽昭然矣浙江等十道御史趙士登等揭

稱朝鮮為國家東藩秉禮執義奉天朝命迄今惟謹頃者不幸而有倭患禍至殘八路覆三都夷二墓火五廟國之阽危直如一髮引千斤勢至極矣猶誓不屈首於倭而控籲中朝不啻赤子之求慈母國家亦素諒其無他不惜七年征討之費以有今日揆之情理朝鮮之仇倭而德天朝豈待智者而後辨哉夫誘倭內犯必大有利於朝鮮而後可乃朝鮮之被倭豈惟不利而社稷幾不保焉誘者顧如是乎假道逼脅向卽疏奏舉國顛危尤堅決鬪卽天兵所至不憚搜控負擔以供芻菽而三軍將士盈八萬

人耳目曾無一人謂朝鮮誘倭者獨一丁應泰無端誣之是信乎職謂朝鮮萬無誘倭之情既無其情萬不宜勘第得明旨慰諭毋令久不自安庶幾塞讒賊之口而懷柔道得矣各等因看得朝鮮國王姓諱具奏前事臣部遵旨會議在諸臣大都謂朝鮮世篤忠貞無背德通倭之理疏極悲憤有跼高蹐厚之情咸願我皇上鑑彼二百年不貳之心免行一時無端之勘或勅諭早叙功勞或旨慰國王安心各據所見並出條揭但此莫外安內之舉仰關朝廷威福未敢擅專謹將各臣議論備錄上鑑恭候

聖明裁定臣等遵奉施行奉

聖旨將後貳本詳議

附兵部咨文

兵部爲賊臣賂倭賣國邪臣橫詆怙姦懇乞

聖明大奮乾斷顯誅和黨發罷孤臣事兵科抄出後軍都督府等衙門掌府事太師兼太子太傅定國公徐等會題前事奉聖旨這丁應泰本說用賄買倭退兵自可公論理斷七年狂冠豈五千兩銀能買其退軍國大事着府部多官會議旣稱朕明見萬里國是已定人心翕服如何只以數言覆奏了事昨發

邢玠萬世德貳本又不併議來說姑不究速將後貳本詳議來說兵部知道欽此先於吏科抄出總督刑題為科部查勘已畢會審未竟先行官軍久候人心驚疑謹直叙行勘始末大槩以明觀聽并請蚤賜催勘以遏亂萌亟行罷臣以息兇謀事奉聖旨吏兵二部會同府部九卿科道一併看議來說欽此又該經理萬題為東事尚未會勘科臣遠出王京謹據實奏聞以俟宸斷事奉聖旨這所奏內勘科徐觀瀾替畫丁應泰去住急迫朝鮮軍民泣告神言殊為駭異且各官軍鱗集王京會勘豈可遲緩便着

該部科作速看議來說欽此臣蕭等據奏賂倭一節事理有無已蒙宸斷無容別議所有督撫二臣具題前因奉旨在會議之後未及併議今奉明旨臣等欽遵於十九日會集各官於東闕會議在後軍都督府掌府事太師兼太子太傅定國公徐本府僉書武定侯郭前軍都督府掌府事永康侯徐左軍都督府掌府事武進伯朱右軍都督府署府事彰武伯楊都督府掌府事靖遠伯玉刑部右侍郎董揭稱督臣邢所論不啻數百言歷歷皆丁應泰激變生釁之事剪髮剝眉已非至願大書呪語更爲

怨深且招亡用事軟血會盟欲何為哉果爾則三尺
之法必不容赦矣徐勘科奉命查勘只宜速行奏
報不當循情替遙方今朝鮮八道既已蕩平釜山諸
島潛倭盡去惟論功行賞覈實輕重班師振旅以還
朝廷一則休息各路戰兵一則省節轉輸糧餉量議
防禦以備不虞此今日之急務也何得嘵嘵多論以
紊宸聰哉又該吏部尚書李戴等揭稱倭奴遠遁
屬國盡復皆仗皇上之威靈告廟獻俘此國家之
大體也功疑惟重罪疑惟輕奉有明旨又激勸之微
權也乃贊畫丁應泰復為深求似有成心勘科徐觀

瀾不卽速完料有掣肘以致人心疑畏惡語相加
國體傷矣及今宜令贊畫蚤回以安人心勘科速勘
以省糜費至於朝鮮人民橫出惡呢雖有所激亦非
事體仍行國王查明戒之又該太子太保戶部尚書
楊俊民揭稱倭奴盤據金山肆齷屬國天朝興救
援之師六七年間未易蕩平此其志豈在小哉乃今
鯨鯢屏跡海徼廓清實賴皇上神武獨斷一意進
勦用能奪關首之魄而成不世之功若謂納賄伍千
可使之悉衆以去恐理所無功疑惟重罪疑惟輕大
哉王言足為千古斷案矣朝鮮恭順之邦耻被不韙

之名卽有咀辭當置勿問第數萬之衆鱗集待勘科
部二臣不待竣事而歸撤兵無期糜餉不貲何以結
完局而慰 聖心督撫經理之疏似非得已合無嚴
勅科臣遵照 明旨蚤為會勘且奏倘遠離王京往
返耽延監軍御史原有紀勘功罪之責令速勘結亦
可併 勅督撫諸臣亟圖善後良策尅日班師無致
久羈朝鮮重困 中國為今日計無先於此者又該
禮部左侍郎兼翰林院侍讀學士余繼登揭稱功疑
惟重罪疑惟輕所以慰安將士之勞振揚 胡廷之
威者 聖意已定然必特遣科臣查勘者亦以功罪

明而後可以議輕重且今提功罪之衡操輕重之權
者在上不在下也據督臣撫臣二疏則科臣徐觀瀾
已回矣夫呢詞乃呢丁應泰者與科臣無干何為而
遽回哉且呢詞不揭於替畫初奏之時而揭於會勘
之日科臣不回於久居王京之日而回於會勘之時
此其中必有緣故但事在異國勢難遙斷科臣雖回
亦當不遠似宜仍令科臣隨所駐之處會同總督經
理監軍諸臣各秉公心勿執偏見速為勘明具奏至
於有功當從優叙有罪當以功贖宜靜聽 皇上處
分無滋煩議以耽日時則人心自服 國體不襄士

馬蚤得解散免致他虞朝鮮蚤得安全無所顧慮矣
太子少保工部尚書楊一魁揭稱贊畫丁應泰之疏
大抵不以血戰為功惟以捐軍為罪事在彼中難以
遙度但區區之見以為倭奴盤據釜山縱橫七年朝
鮮被其殘破幾乎淪胥為倭賴 皇上英斷命將東
征一旦蕩平雖未必盡係將士之力較之沈惟敬之
初議加之以封爵與之以金幣不能使之去而此能
使之一倭不留其功似亦足多其間縱有委曲解散
之情似應置之不問昔漢帝出黃金四百萬斤與陳平
恣所為不問其出入千古以為奇計平豈賣國者耶

何應泰執迷不悟而勘科不能諒之以心亦惑矣節
奉 明旨七年狂寇豈五千銀能買其退敗大哉

皇言昭如日星誠不能出於 聖斷之外也又看得
總督邢 經理萬 二疏大率謂丁應泰百計沮撓
敗壞東事勘科徐觀瀾偏聽其言致灰將士之心其
事之有無亦難憑信但所爭者只論陣亡軍士多寡
耳臣查 大明會典內載凡奮勇迎敵殺退虜賊雖
斬級數少官軍陣亡數多仍須論功陞賞不許妄引
損軍律例又開載將領官軍如果深入虜營衝鋒陷
陣致有損傷不坐將領之罪止出格優恤死事之人

邇者倭勢猖獗更甚於虜諺云殺人一萬自損三千以十萬之衆交鋒對敵安能保其無所損傷縱如應泰所計之數而倭寇已平功浮於罪情有可原正明旨所謂功疑惟重罪疑惟輕彼吹毛求疵因小害大不足聽也謹按洪武初倭寇兩浙遣湯和徐輝祖等練兵又遣楊文等出戰於海巡倭皆上公元侯謀臣宿將且遲數年未得寧息復遣南雄侯趙庸招兵貞外郎李宣諭倭奴迨至二十五年以後而海上始得安靖今倭寇作亂取海外三十六島勢如破竹朝鮮已半為倭有賴我兵征戰保全屬國此皆我

皇上神武遠振所致於太祖有光宜催勘科復回王京同監軍御史盡去成心秉公會勘據實刻期具奏告廟宣捷量功行賞以慰三軍之懸望以揚一人之威靈以寒四夷之心膽利莫大焉仍令總督經理務於金山設立總兵鎮守量留精兵一萬督率朝鮮屯田演武以圖善後使倭夷永不敢侵疆是職等所至願也又該都察院左都御史溫純大理寺左少卿甘士价揭稱贊畫丁應泰賂倭之說聖鑒已明無容別議及據督撫邢萬疏稱科部二臣種種疑忌及以呪詞故寃去王京不肯會勘果爾將互持

異議未有已時耳竊謂天下事宜存大體無執成心
今既一倭不留屬國蓋復便當宣布 朝廷威德優
恤將士勞苦其他不必過為苛索伏讀 明旨功疑
惟重罪疑惟輕二語諸臣可以洞然矣丁應泰旣為
朝鮮痛恨必不敢復入王京而勘科徐觀瀾原奉
特遣如蔚山功罪自當公同勘報萬一勢難久待則
諸路兵馬業經各衙門分授點數應卽令經理監軍
就彼虛心一審移該具題倘中間微有異同處分聽
之 聖斷可也若勘叙近日四路戰守功次與倭退
來歷則監軍御史宜專任之其撤兵善後機宜自是

督臣之責亦當會同撫安上緊計議奏報總之在發
圖收拾勿更耽延不惟坐耗錢糧且或釀成他患諸
臣慎之又該吏科都給事中趙完璧兵科給事張輔
之浙江道御史趙士登通政司使范峯等揭稱國家
之亟勦倭寇也七年經營一朝淨掃 聖心嘉悅中
外具應使當事諸臣同心體國蚤為勘結慰 九重
宵旰之懷答薄海踴躍之望釋將士久羈之苦省輓
輸難繼之財豈不共成 盛美有光大烈也哉乃竟
以苛察致犯公議如贊畫主事丁應泰及遣勘科臣
徐觀瀾者且於將次會審之際適有耆老呴文之榜

應泰既不待畢事而歸觀瀾亦遂為接踵而行不成
結局何復欽命良可訝也既經總督邢及經理巡
撫萬各叅論前來委應議處據稱應泰既犯衆惡
似宜先令回籍聽候處分以安衆心徐觀瀾既離王
京亦難責令復往會勘但其所勘原係島山等處功
罪及隱匿陣亡等項情由今經查勘已畢當亦業有
次第所少者一會審耳合無行令本官止將前項勘
科文冊移文督撫及監軍御史知會同為題奏以憑
宸斷其九月以後僂退擒功次已經督撫叙題者
悉令監軍御史就便覈實真奏至善後撤兵事宜并

責督撫作速從長議覆施行則事局發結浮議自息
蕩平之政不外是矣各等因所據諸臣共詳督撫二
疏各矢公評具有前揭大都以國體軍情為重竣事
班師為急臣蕭大亨既職掌與議竊謂主事丁應泰
徃年之初疏也非盡無因其在於今堅執求勝之私
意遂致羅織之太苛將士既已離心屬國復為滋懼
倉卒馳歸殊駭觀聽諸臣謂其損傷國體臣等亦以
為然若令仍復會勘未免掣肘耽過或令回籍或令
回京仰聽聖明處分其勘科徐觀瀾奉有查勘蔚
山等處功罪專勅會勘已完所少者一公審耳責

任重大豈應泰所可牽引查據本官移書撫臣內云
暫移數舍恭候 明旨儻遂所請便馳車西邁不然
文移往來恃主盟速畢王事是科臣尚在凜凜候命
未嘗不以完勘為事也或者果爾量移以便清吏文
冊皆不可知且蔚山等處功罪既經親勘或回王京
或就近處隨便會同監軍御史陳效各秉虛心從公
確議馳走還 朝方為不負 特簡其九月以後四
路功罪與夫善後留撤兵將等項事宜俱應嚴行督
撫監軍等官作速勘處毋徒滋議以致虛糜此皆諸
臣條議之所及臣等曷敢有異同焉及照朝鮮受誣一

事其國君既憲於自白其國人又憲於為其君以求
白至告之神明不少避忌雖情實憤激而體或非宜
第念東征七年本以存恤寡小不必過為責備准是
陪臣逡巡恐懼待一命日久仍祈 俯檢臣等前議
亟下 勅旨馳慰王心俾曉然告戒國人共仰 皇
上日月之明不為人言所惑舉國安心共圖善後毋
得仍前疑畏妄生怨詛自蹈無知之罪庶幾於始終
字小大義稱完局矣臣等區區之愚如此統候 聖
裁臣等遵本施行等因萬曆二十七年二月十九日
本部等衙門尚書等官蕭等會題二十二日奉

聖旨覽卿等今次會議各出公論詳明更無異詞國是
方定人心方服如何前議止以數言了事豈朕委托
之意國體軍情皆朝廷大事朕豈以一小臣私忿妄
許不念將士久戍勞苦與屬國君民泣顙苦情丁應
泰舉動乖謬威制勘科幾誤大事姑着革職為民回
籍聽勘徐觀瀾奉有專命還赴王京會勘務須秉公
持正以稱任事一面着督撫詳列四路功罪善處留
撤事宜星夜馳奏勿得妄懷憂疑稽留軍事朝鮮正
俗部裏移咨慰諭俾知朕始終字恤德意仍令戒訓
國人益堅恭順之節欽此欽遵凝合就行為此合咨

前去煩為欽遵 明旨安心釋慮力圖善後事宜用
光王業仰副 皇仁仍曉諭通國臣民咸使知受誣
一事 聖明洞然遠覽業有處分各宜恪修職業永
矣忠誠毋得妄自疑畏有辜 德意須至咨者

月沙先生集卷之二十一

月沙先生集卷之二十二

奏

被誣辨明奏

丁酉

朝鮮國王臣姓諱謹奏爲仰瀝危悰備陳情事懇乞
聖明特賜照察容令自效事竊照臣以謫劣無似叨守
藩服致寇喪國罪無所容 聖恩寬大終始含容刑章
不加恩旨又降乃於本年十月二十四日臣與一國臣
僚祇受 勅書莊誦再三感淚自零其勉諭之丁寧責
勵之森嚴不啻提耳而面命驚惶隕越無地自處退伏
惟念臣才旣駑下勢又艱難始之不能思患預防狃安

忽戒猝遇狂寇自底顛躋次之不能力抗兇鋒死守封疆播棲一隅墜失基業煩奏乞師致勤盛舉貽朝廷宵旰之憂以至于今對壘六年疆土日蹙委靡轉甚莫能自振狡倭再入遮遏無力政紀弛廢浸潰相繼致令王師督焉勞苦是臣前後辜恩失職之狀聖明固已洞燭以此受罪臣雖萬死固所甘心若其近日叅奏中所論則有迹之疑似而情實不然者又有天理萬萬不近者不得不粗陳實狀以冀天日之照察焉伊賊屯據南邊今已五年小邦兵力分頸把截臣以閑山爲海路要衝而南原爲全慶門戶一國民心恃以爲固

及賊潛師猝襲而閑山失守悉銳急攻而南原繼陷自是之後人情洶懼無復可倚全州以北次第潰裂鳥驚魚駁不能自定臣雖多方禁諭猶莫能止逮乎賊迫漢南而都城之外將爲戰場臣知事勢危急稟議於經理提督始出家眷於黃海道地方臣則董率臣民及諸道徵兵悉聽經理提督指揮以期奔走於行陣之間效死於天兵之後臣雖至愚寧有棄國都輕社稷而甘匹夫草間之偷生乎且臣以覆亡禍敗之極無復支撑之勢而幸賴王師得有今日傳肉於旣骨之後回生於絕命之日拔臣於塗炭之中置臣於衽席之上其生成卯育

之澤非獨臣身薄海生靈無一物不被再造之恩是則王師之於小邦雖天地父母不足以喻其賜其願望仰戴之切不啻大旱之於雲霓惟欲粉骨糜身庶能仰酬其萬一又安有一毫怠慢之心於其間哉天兵萬里暴露載閱寒暑深歷險阻備嘗飢渴千辛萬艱鄙爲臣故每一念至寢食俱廢縱物力殘薄接應未稱辭語不通情意莫暴而區區之心常以不能盡達微誠烏恨以臣之國不能自救而仰救於王師以臣之讎不能自快而求快於王師死生存亡俱係於此厚施而知感卽狗馬猶然臣雖無狀亦有人心寧有視如秦越而不爲

關情之理乎不特此也小邦之人自聞王師之下雖深山窮谷無知蠢動之氓莫不感祝皇恩涕泣相慶於瘡痍溝壑之中舉有欣欣更生之望簞食壺漿奔走爭迎或至傳謠以著愛立石以頌德又有出粟而助餉傾資而納械皆出至誠非待勸諭蓋其恤難之仁拯物之澤浹洽於人心而有不容自己者也惟是臣旣不能振拔於積衰之末勢又不能奉揚於敦勉之屢旨邦力匱而事不易辦國謀憤而機或致悞一敗不振萬事瓦裂速戾招愆積受評彈而唯其一心拱北之誠有似萬折必東之水皇天后土所共鑑臨其可誣乎雖削弱日

甚艱危轉極耿耿此心猶不以駑劣自諉只欲憑仗
聖天子威靈協助諸將臣規畫開裂秉誠竭盡底蘊以
期上答 洪恩下雪私讎誓不與此賊俱生此臣之所
以日夜腐心者也至於甘心爲倭之說言之失魄塞氣
誠不忍再有煩辨冤痛之忱已籲於前奏 聖明之鑑
想燭於覆盆而如所謂浸淫啜噴等說尤切痛愍夫行
詐與失信雖匹夫不可以行州里況於爲國乎況於君
父之前乎小邦雖極僻陋世被 列聖東漸之化粗知
君臣父子之道恪事 天朝二百年于茲亦嘗以忠順
見稱矣亦嘗以禮義見賞矣遺風餘俗固結人心非臣

一朝所得以斬今乃至于臣身而蒙此不贛之名是臣
不惟獲戾於 聖明而又得罪於祖先無以自解於臣
民皆緣臣無狀以來人言慙覲自反祇自冤結蓋強弱
勢也得失時也死生命也斯固莫之如何而唯其義理
之在人心者不以事勢而有所變易不以危急而有所
撓改惟所在致死而已孔子曰名不正則言不順言不
順則事不成明大義正倫紀誠今日討賊之根本臣之
情事苟或有一毫未白於 鮑縗之前固不敢容喘息
於覆載之間卽臣亡國亦餘事耳其安可悶默而已哉
此臣所以痛心自訟仰首長號而不知止寧受冒昧之

誅以死而不忍一日受此名而生也伏願聖明容恕
積戾湔滌羣疑俾臣得以自釋於昧則瞑目入地無
復遺恨情溢辭感不知所言臣無任瞻天望聖激切兢
惶之至爲此謹具奏聞

經理楊鎬被叅撤還請留奏戊

朝鮮國王臣姓諱爲大兵旣集撫臣被叅羣情疑惑事
機將失懇乞聖明洞察實狀亟回乾斷策勸鎮定以
畢征討事竊照臣以覆亡禍敗之極無復有自爲之勢
欽蒙皇上天地父母曲察小邦危亡之勢洞燭凌奴
兜狡之狀發兵增餉皆出睿斷終始七年再勤益舉

優恩異渥曠超千古綿綿扶植以至于今皇威赫然
天下顛倒羣臣震懾奔走效勞蓋嘗一捷於稷山而京
城全再蹙於青山而湖甸完三蹙於島山而賊已褫魄
矣目今大兵齊集聲勢甚壯布置已定師期指日蓄銳
待發臣感激洪造傾戴豐功方與一國臣民竭力拮据
供給資糧仔看摧殲廓清之舉不意今者京報忽傳軍
中喧播撫臣揚鎬杜門省愆上本辭職今將擺棄事務
促裝西還臣始而疑中而訝終乃大駭且惋且憫如橫
舟巨海震風駭浪之中篙師忽去愍然以待死亡之無
時也疏中所論臣不得詳臣不敢辨聖鑑孔昭明見

萬里是非虛實輕重利害固已洞燭而無餘臣不敢有所煩籲第據其流聞則多是情外不近之說亦有稱鮮人所言而通國之未曾知者無乃出於傳者之謬耶伏見撫臣經理楊鎬自膺簡命銳意東事與督臣邢玠按臣陳效協蕡謀猷殫竭思慮其一心討賊盡瘁圖報是素所蓄積而勇往直前不避險難當機力發遇事風生最其長處也且莅任遼道經歷多年諳委本國殘破之狀痛懲棍徒科擾之弊約已甚簡冰蘖自飾束下甚嚴秋毫無犯法令峻切羣下畏戢各營官兵一聞其令無不股慄相戒搖手不敢爲非是則小邦之人雖三尺童

子皆所歎服而上年秋兇賊狂鋒已迫漢南小邦都民舉皆驚潰鳥散魚駁莫保朝夕揚鎬時在平壤一聞急報便於卽日單車疾馳冒入危城慰諭餘氓申飭將士使都心坐賴賊情畏沮遂却賊於談笑指揮之間此蓋人所難爲而小邦之得有今日皆其力也至於島山之後則被堅執銳深躁戎馬之地暴露虎穴過十三晝夜約束號令爲士卒倡提督麻貴副將李如梅亦皆督率諸將冒死上陣焚燒内外砦柵斬獲千餘首級鎬則晨夜督戰唇焦面黑賊酋清正窮蹙自囚圍困一穴渴餒幾斃是蓋曠世之奇功而不幸天雨急寒士卒凍傷露

師多日軍容漸疲兒援外添賊備內固將有腹背受敵之患楊鎬密察事機宣令左次仍將遺下糧餉盡行焚燒身自爲殿賊不敢躡此則不特天朝將士所共目見小邦邊臣皆懷感歎傳誦以爲盛事只恨天不助順賊反乘便孤圍未拔巨魁逋誅其謂之未能全勝則猶氣是其一戰之功未必非再造之基而其所勦實狀則或薄城先登或羸師誘賊或選銳按伏或分兵控扼或邀截賊援或孤守海路某軍勇往某軍逗遛某營先導某營殿後某將傷於丸某將死於刃及功勞多少人馬

死亡之數則當時領兵陪臣權慄以下諸將領各營跟隨陪臣李德馨以下諸人各自飛報無不相符文報昭然俱在可以一一就驗天日在上豈敢有虛萬目共覩豈敢有私臣於其時卽將經理及諸將勞績具奏上聞以謝天恩而被楊鎬力止而寢臣常以是爲歎曾不料今日之論至此紛紛也若其情外不近之說尤不足多辨而當事之臣易招人議功罪之間難適衆情自古皆然何足深恠第水陸大兵已轉京城發運錢糧亦過累十萬鎬方晝夜規畫料理事務凡小邦道里遠近山川險易及賊情虛實敵勢堅脆無不稽讐商度籌定於

胸中提督麻貴親領大軍今方駐劄於慶尚地方簡閱器械修繕營柵以待可乘之便近據邊臣之報兇賊自島山之困死傷既多挫衄太甚一見天兵甚有恆懼之狀已添調大勢新兵將以七月渡海進搶此正先發制人之秋也小邦存亡決於此舉而流言一播軍情煽動或言經理有罪或言提督亦還或云大兵將撤或言和事已講自相簧鼓洶洶不啻銳者喪而懈强者疑而阻徘徊銷縮坐失事機使九仞之功虧於一簣豈不痛惋仍念此賊屯據海上于今七年其以講好之說謾我天朝者凡幾遭矣一邊通款一邊廝殺者又未知其幾遭

天朝之與小邦爲其所賣者亦已多矣卽今奸言無不敗露而使軍機差誤邦命漸盡者皆其祟也此則愚夫愚婦亦知其詐曾謂鎬之身擔東事而不料此耶去二月時分清正差倭奴一名與被擄人一名假稱奉書於提督行至竹山經理卽將倭奴交付於吳副將仍拿治兩邊防守將領又於四月間行長又遣朱元禮要時羅陽爲求欵之辭潛逞緩兵之計藏兜穉惡探我虛實以待新兵之到此乃伊賊故態經理洞見此狀拘繫其使不發其書將欲愚以秘筭服以兵威抑揚操縱使賊莫測端倪臨機行計務出萬全小邦之人方歎服之不暇

今若執此而謂之講和則豈不寃乎臣又查此賊東自慶尚道之蔚山島山西至全羅道之順天倭橋連營列屯首尾九百餘里出入島嶼建築砦營其小柵則不記其數而大屯之可歷指者通共有二十餘區今方添兵添糧舸艦蔽海苦蓋房屋大起農功以爲久住之計則此賊兇謀固非但已而衆之多寡盛衰據此可知今乃云倭衆本少而張皇馳報要減已發之兵糧以沮垂成之機會縱臣無狀以爲自爲之地 天朝大官來此者凡幾人乎其皆黨護於臣以罔朝廷哉此則不難辨也茲者大局將結已到八九分地頭七年經營之功政在

今日而一場說話竟壞此事主張無人萬事瓦解中外遑遑駭目相視人心驚濶氣象愁慘若使兇賊諭知此情則必抵掌而起酌酒相慶此正伊賊日夜窺伺希冀而不可得者萬一乘此軍情之搖動或潛師猝襲或大舉長驅彼亦何憚而不爲哉言之至此氣塞膽裂小邦不祿天不見佑種種潰裂將成復敗卽臣之滅亡有不暇計而竊恐天下大計自此去矣况楊鎬旣奉明命經理小邦小邦存亡成敗俱係於此苟其所爲或有如叅奏中所云則是不但負 聖明又將以壞小邦臣當上念 聖明下顧小邦尚何愛於揚鎬而乃敢曲爲煩辨

爲楊鎬遊說自速滅亡之禍以陷欺罔之誅哉臣雖無似決不至此盈篋之書發於奏功之先則中山之捷不可期也淮西之議苟非唐宗之獨斷則裴度之師幾乎中止惟願聖明洞察事機推誠勿疑亟留楊鎬以鎮羣心以濟大事小邦幸甚天下幸甚臣無任瞻天望聖懇迫兢惶之至謹昧死以聞爲此謹具奏聞

請留經理再奏

戊戌秋○數款
刪改用下文

朝鮮國王臣姓諱謹奏爲撫臣革回人心危懼兇賊覬釁禍機將發懇乞聖明深思天下大計曲察小邦情勢特令仍留管事以鎮羣情以畢拯濟事據議政府狀

啓臣等與各該陪臣及京城耆老軍民人等詣都察院衙門懇告請留本院竟不允可已於本月十一日決意登程因此人心遑遑益爲危惧合無再將前項陳奏事情另差本府陪臣齋奏天聰以冀洞察小邦危急情形畢加拯濟相應等因具啓據此具本另差陪臣崔天健星夜齋奏去後今該前因臣竊照臣才劣祚薄獲戾上下被兵七年日就淪喪天不見佑事皆敗意悶迫之情危急之狀前後叫籲蓋已不勝其煩複矣聖恩寬大如慈父之憐愛赤子有呼必應無願不遂以至於今大兵已發矣糧餉已運矣天威遠暢聲勢堂堂臣

之始望至此而無以加矣臣自幸滅賊有期深讐可雪
垂亡之國再存於今日也惟當恭俟結局快覩盛舉不
意旬月之間事機變換堂堂之勢轉爲杌陧許多經營
竟歸難了臣於是時若以煩複爲嫌不陳此間實狀則
深恐聖上拯濟之恩終無着落而卽臣之滅亡有不
暇言矣自撫臣楊鎬革任回還之後羣情懈潰莫可收
拾遠近傳播自相疑惑或云和議將講或云兵糧當減
久役思歸之士胥動浮言握兵對壘之將皆無固志小
邦之人舉皆驚慌若無所依扶携老稚填咽轅門攀駐
牙旛啼號不止至於深山窮谷無知蠢動之民皆云經

理一去賊必隨至遑遑靡定無復生意付道悲嗟景象
愁慘人情若此同出至誠夫豈有私於楊鎬而然哉朝
廷處置固非疎遠之臣所可干議叅奏所論臣不敢知
是非虛實臣不敢辨第以小邦耳目之所覩記者言之
則單車赴難冒入危城談笑却賊再全邦命臣以是知
其義身先士卒擐甲上陣薄戰島山幾縛清酋臣以是
知其勇任怨敢爲一心擔當銳意討賊晝夜焦勞臣以
是知其盡瘁之忠矣規畫處置動中機宜發號施令刃
發風生臣以是知其濟難之才矣沐蘖自飭秋毫無犯
羣下畏戢不敢科擾臣以是知其法度之嚴矣其他施

爲措設皆有以大慰人心而使小邦精神一變庸懦知勸者皆其賜也臣常歎服私竊自幸以爲小邦之得遇斯人殆天所以授大醫王於絕命之日也曾不料今日之論遽至於此也况天下之事有輕重利害而兵家之勢固難遙度於局外臣叅以小邦之情酌以今日之勢則楊鎬之不可去有七來茲日久經歷艱危道里遠近山川險易無不洞察一也島山之戰旣已嘗倭賊之堅脆虛實無不磨礱商度庶臨敵戒謹不致踈虞二也大兵齊集師期有日布置已定規畫已成三也將才勇劖軍情利鈍諳委已盡各適其用四也快於幹事身任其

勞催糧造械咸得其宜五也屢挫賊鋒威名已震爲醜虜所畏六也東民愛戴樂於趨令得人之死心七也有此七者其餘固不可計也臨陣易帥大犯兵家之忌假使撫臣所爲盡如衆奏中所論猶當寬貸責成以竟大事事竣之後徐議功罪亦未晚也矧乎萬萬不近者乎抑臣有大悶者小邦軍興七載削弱日甚外以備禦強寇內以供奉大兵以至今日邦力已盡綿綿一脉不絕者綫耳以臣之衰微不亡何待而猶有所望者只以今日兵糧已集一場機關將決於目前臣方與一國臣民忍死竭力懸待此期而今若一番敗壞一番更置遲

延時月蹉過秋冬則更無餘力可以支撑舉國民命已盡於倭賊未到之先矣豈不痛悶豈不痛悶仍念此賊屯據海上七年于茲其以求款之說瞞我者凡幾遭矣要其計不過爲緩我之兵敗我之機而已蓋兵緩則師老而莫振機敗則氣沮而難收大兵久駐其勢自然銷縮彼方以逸待勞徐起而乘其弊此乃兇狡之故態其爲計豈不巧乎今者水陸大兵分道齊下先聲所及湖嶺震動楊鎬方唾掌臨戎剋日舉事汎送諸將指授方略賊首行長懾於兵威邀以信使陽爲求款以圖緩師楊鎬洞見其狀拘繫其使方將以言籠絡發其奸謀催

兵督餉以期迅掃而小邦不祿機會又疎九仞之功虧於一簣竟使老賊得遂其謀天乎天乎孰使之然哉臣近據邊臣之報兇賊積餉鍊鋒日肆狺然又添調大勢新兵將以八九月時分大舉西犯近且覘知軍情搖動主管無人益有乘時竊發之謀已搶樂安及陝川等處恣行焚掠無復顧忌長驅直上彼亦何憚而不爲哉念及于茲心膽俱寒悶迫之忱已申於前奏 聖明之鑑想燭於萬里而憂危之狀日急一日復此冒昧塵聒不止臣非獨爲楊鎬也誠以小邦今日之勢有不容自己者也伏願 聖明曲察微臣危迫之悃亟留楊鎬以責

月波集卷之三
十三
後效小邦幸甚天下幸甚臣不勝所懇切祝戰灼競惶之至

請留經理再奏

朝鮮國王臣姓諱謹奏爲賊情變動兇鋒竊發撫臣革回人心危懼懇乞 聖明洞察小邦情勢委任當事蓋臣亟行征討終始拯濟事竊照臣才劣祚薄獲戾于天被兵七年日就削弱其悶迫之情危急之狀前後叫籲蓋已不勝其煩矣 聖恩寬大如慈父之憐愛弱子有呼必應無願不遂以至于今大兵已發矣糧餉已運矣天威遠暢聲勢堂堂臣之始望至此無以加矣臣自幸

滅賊有期深讎可雪垂亡之國再存於今日也不意旬月之間事機大變軍情益懈賊勢漸張臣於是時又以煩瀆爲嫌不陳此間實狀則深恐 皇上拯濟之恩終無着落而卽臣之滅亡有不暇言矣竊查兇賊之狺然南邊今已七年增兵添餉籌城鍊鋒積擧藏兇其志固非但已其視小邦直欲一吞而相持到今不敢大肆者徒以有 天兵爲之鎮壓耳然其日夜窺伺探覘釁隙欲逞其滔天之計者固未嘗一刻忘也自撫臣楊鎬革任西回軍情懈弛全慶疑惧我勢先動賊已乘之蓋已東搶於慶尚左右道而清道密陽河陽永川慶州陝川

星州三嘉等一帶並被焚掠西搶於全羅道而樂安康
津寶城海南長興沿海一帶爲之騷然猖狂豕突無復
忌憚悖語慢言又非前日比邊書告急朝到夕至目今
事勢十分危急而主管無人中外潰裂至於胡說傳播
遠近簧鼓或云和議將講或云兵糧當減將士泮瀆皆
無固志人民驚慌若無所依行道悲嗟景象愁慘夫兇
賊之竊發非必因楊鎬之去而楊鎬之革任適會於賊
動之機以此人情攀慕洶洶靡定眷戀之心同出至誠
夫豈有私於楊鎬而然哉特以楊鎬銳意討賊一方幹
事庶幾鎬在則賊可滅耳其情亦可哀也蓋楊鎬之得

此於小邦者實有其由上年秋倭賊大勢逼于漢南都
城朝夕將潰楊鎬單車赴難談笑却賊再全邦命此誠
人所難爲而其功不可忘矣島山之戰爲將士先倡擐
甲上陣連日大捷幾縛清酋其義氣膽勇在人耳目卽
此二舉而小邦之信服者深矣觀其擔當東事晝夜焦
勞任怨敢爲不避訾謗則楊鎬之受任盡瘁者至矣憐
愍小邦仁摩義勵法度嚴明軍兵畏戢則楊鎬之約已
律下者著矣至於親括運船董造軍械措置規畫日不
暇給其發號施令皆有以大慰人心使小邦精神一變
庸懦知勸者皆其賜也臣私切自幸賴此人而完事曾

不料今日之論遽至于此也況來茲日久經歷艱危道里遠近山川險易無不洞察賊之堅脆虛實將之賢否勇惲無不周知俱有定筭威名爲醜賊所畏舉措爲東民所服而一朝忽見遠易夫外國事勢難易須經歷而後方悉狡倭形勢虛實須熟探而後方驗若此者豈能了於時月間乎其勢不得不更費一番工夫而師期坐失大事不免於遲悞矣假使撫臣所爲盡如叅奏中所論猶當寬貸責成以圖結局事竣之後徐議功罪亦未晚也况其所論情外不近者乎抑臣之所大悶者小邦軍興既久殘破已極外以備禦強寇內以供奉大兵以

至今日邦力盡矣綿綿一脉不絕者綫耳以臣之衰微不亡何待而猶有所望者只以茲者兵糧已集一場機關將決於目前臣方與一國臣民忍死竭力懸待此期而今又一番敗壞一番更置遲延時月蹉過秋冬則更無餘力可以支撑舉國民命已盡於倭賊未到之先矣豈不痛悶仍念此賊屯據海上東西八九百里列寨連營聲勢熾張而其以求款之說瞞我者凡幾遭矣要其計不過爲緩我之兵敗我之機而已蓋兵緩則師老而莫振機敗則氣沮而難收大兵久駐其勢自然銷縮彼方以逸待勞徐起而乘其弊此乃兒狡之故態其爲計

月二十一日
三
豈不巧乎曩者行長講說纔畢而旋陷南原殺天兵三千已事可戒今者水陸大兵分道齊下先聲所及湖嶺震動楊鎬方唾掌臨戎克日舉事布置已定規畫已成苟不乘此機會催兵督餉一大懲創則雖欲省費行計苟完目前適以滋起後患而天下受其禍此時用力又萬倍矣爲今之計須及兵力未老餉道未竭小邦物力不至澌盡奮勇決策一舉迅掃此乃先發制人之謀一勞永逸之策而天不見佑事皆敗意九仞之功虧於一簣竟使老賊得遂其願天乎天乎孰使之然哉機會一跌賊勢漸熾督臣邢玠又未來到舉國蒼黃益無依

伐彼長驅直上何憚而不爲哉念及于此心膽俱寒切迫之情已申於前奏聖明之鑑想燭於萬里而憂危之狀日急一日復此冒昧塵聒不止臣豈爲一楊鎬哉伏願聖明憐察微臣危迫之懇洞燭兇賊猖獗之形委任蓋臣趨期征討使天朝拯濟之恩終有所結局小邦垂絕之命不至於盡喪則小邦幸甚天下幸甚臣不勝懇祈切迫戰灼兢惶之至爲此謹具奏聞

築城事辨誣別奏

戊戌秋

朝鮮國王臣姓諱謹奏爲仰瀝小邦危悰兼陳完賊情形懇乞聖明特賜照察以雪冤痛以畢拯濟事竊照

臣才既謙劣勢又艱難喪敗七年衰微不振辜恩失職罪戾山積科評廷劾前後非一而聖恩如天終始含容刑章不加寵卹曠世溫綸以慰勉嚴諭以警勅指示生人之道如父誨子臣常感激鴻私刻骨銘肝惟欲策勵昏庸殫心力上答隆恩下雪私讐以效臣節於萬一茲者危衷莫白而橫被誣枉賊勢愈急而邊議未定冤痛切迫之狀不得不粗陳梗槩以冀天日之照察焉伏見兵部贊畫主事丁應泰揭疏其中一欵以尋城屯守歸罪於楊鎬而又以堅城得志疑小邦異日之患至有不可忍言之說臣始見而疑不省所謂終乃

大駭不知所出誠不欲掛之齒牙有所論辨第以人臣一日被此名則一日不可自安而苟或有一毫之未白則固不敢容喘息於覆載之間所謂事急不可緩聲煩瀆之嫌固不暇計臣請先陳小邦情事繼言兇賊形勢查照小邦以一隅彈丸三面受敵其隄防之備保障之具自有國以來固未嘗不謹而至我太祖高皇帝明降璽書諭之以尋城禦倭之道教戒勸誨不啻丁寧詔旨森嚴在人耳目爲東方金石之典至于今如一日遂於京都及沿海地方俱設城壕聖人垂訓創制之義誠王者一視之仁而其綢繆陰雨之戒至深且遠矣惟

是二百年來沾太平之餘波席累葉之無事恬嬉既久狃安忽戒猝遇狂寇莫能遮遏城池壕柵蕩然幾盡以至于今兇賊屯據海上東西八九百里營建砦柵苦蓋房屋以爲久駐之計其意盖以小邦物力有限天兵難於久住故深溝高壘以逸待勞急之則入據巢窟緩之則乘時竊發苟非屯兵控扼難遏其鋒故撫臣楊鎬深思遠圖派定三路大營且欲於全慶近賊地方據險等城以爲住劄防守之地此無非經營善後之計而小邦特以力綿財竭未卽奉行爲恨曾不料因此一事罪及撫臣而又致疑於小邦也小邦雖極僻陋猶有箕封

八教之遺夙粗知君臣父子之大義以禮義忠順見稱於歷代自祖先數百年來遭際什明視同內服恪守侯度世被皇眷褒嘉之旨屢降賞賚之恩相望以至于臣負罪最深受恩最厚雖流離顛沛危急死亡而惟其一心拱北之誠炳然如日天地鬼神臨之在上質之在傍其可誣乎蓋君臣綸紀出於秉彝之天人所同有初非強爲而區區願忠之志自謂不愧於天下故雖失職喪國積受羣言而未嘗以臣節一事見疑於天朝也豈意遽被污衊至此之甚乎臣之滅亡有不暇惜而誠恐祖先以來血誠事上之心終歸於無處暴白

是臣不惟獲戾於聖明將以得罪於祖先無以自解於臣民豈不痛冤豈不痛冤仍念此賊自本年七月以後覩知事機變搜軍情搖動分路進搶漸逼腹裏慶尚道之清道密陽陝川高靈三嘉慶州慶山等處全羅道之樂安寶城康津海南長興等地兇鋒遍滿日肆焚掠各營天將督兵遮截方與廝殺而主管無人未易策應近又各該邊臣馳報秀吉將要添調大勢新兵陸續渡海積餉鍊鋒爲謀不止而該賊首清正投示陪臣高彥伯書亦有重動大兵征伐朝鮮及遼東悉殺人民等語兇慘悖逆不可忍言此賊狂謀固不在小蓄禍乘機

正在今日苟不及期勦滅一番大創則小邦之糜爛已不足言而天下大計自此去矣冤枉之情莫伸危亡之禍又迫誠恐惡名未祛於身自此淪滅永抱無涯之痛茲敢仰首長呼而不知止伏願聖上曲察微臣衷悃特賜昭雪兼燭兇賊情形申飭當事諸臣亟行殲殄毋失事機小邦幸甚天下幸甚丁應泰叅論本國辨誣奏見戊戌辨誣錄

請全給折色奏批亥

朝鮮國王臣姓諱謹奏爲留兵月餉萬難接濟冒死更陳冀賜矜察懇乞聖明特令該部再議全給以畢洪恩事准戶部咨朝鮮善後兵餉節經戶兵科臣後先題

請臣等酌量內外緩急覆奉欽依將本色全責該國供辦折色中國量助三分之一其所以保全屬藩者至矣今國王奏留水兵八千防戍海口要將折銀全藉天朝供億顧念中國時事多艱公私交困萬難給發惟是義州等倉見在支剩米豆二十餘萬石若出此餉軍可抵月糧二十萬金恭候 命下本部移咨朝鮮國王除本色錢糧聽該國供應外其義州等倉見儲米豆通准支放守戍官兵抵作 天朝助發月餉之數仍再另發折銀十萬兩以便本折等因准此竊照臣覆亡喪敗之餘荐蒙 皇上天地父母之恩七年之間以臣之故糜

費錢糧蓋已百萬計矣今既驅出賊兵界之全疆猶慮小邦弱不自振復留重兵以禦後患使臣自籌亦不過是非始望所能及此惟思糜粉以期報答只緣小邦財力殫竭繼餉無策曾將留兵減數及月餉全給等事仰籲 天聰恭候裁定今者留兵之數則 廟筭已定臣不敢更議伏覩該部來文要將義州等倉支剩米豆以充月餉助發之數竊念天兵爲小邦勞苦久戍該用軍需小邦皆當自辦况將 天朝米豆作 天兵助餉臣何顏面更有所請第所據支剩米豆通共幾二十萬石而今年水田失收八九月間大米頓缺該管陪臣急

於繼支不得已將此倍搜以供官兵已過三分之一又京城及各處水陸官兵按月交支月不下五六千石見在之數日就消縮前途支放亦且不貲接濟之策專靠於此若過今冬所築無幾目今留兵之數既添九千貟名本色之出已遠於小邦原請臣方憂悶日夜拮据猶恐中途缺絕致誤大事今若以前項米豆抵作月餉二十萬金則不但該數大相不准更將何糧倚以交濟臣實悶迫不知所爲小邦自遭禍患以來前後陳籲不啻煩複有似赤子之仰乳於慈母生成扶護以至于今今則讎賊旣退疆土已復瘡痍者庶幾蘇矣流徙者庶幾

集矣以常情言之則國計兵糧宜若次第收拾矣而匱竭之狀日復一日物力之板蕩民生之困苦反甚於對壘之日是雖緣臣無狀不能自強而究厥所以亦有其由蓋小邦地方偏小財產不廣民丁尠少生聚無因丁酉年以前則賊雖在境而去平時猶未遠民間或有舊蓄州縣或有餘儲全羅忠淸兩道尚免兜煩軍前調度倚辦於此自賊兵再蹂之後湖嶺郡邑焚掠殆盡全慶兩道土地肥沃財穀之產號爲小邦府庫而最被賊燹無復人烟以奄奄垂盡之力供億四路大軍轉輸餽餉于今八年民生之膏血日就罄竭國勢之彫弊如水漸

凋今年不如去年今日不如昨日已到十分地頭矣有似積年大病之人百脉俱瘁投之猛劑病根雖除而元氣已枯蕭然待死不幸天不見佑自春亢旱至夏自夏淒風至秋耕而不種穗而不實秋場纔斂民已呼飢今年稅入不滿四千餘石臣工俸廩庶民賑貸等事一切停廢亦已累年此固母論今方上下遑遑竭措軍餉除賣鬻榷稅外內自百官坊民外至村巷丁戶計口出米頭會箕歛零星湊合僅得繼支以此度日何能爲國剥膚掘髓民力已盡逋亡相繼四起爲盜卽臣徒擁空國以待自亡而誰恐大軍缺餉變出非常辜恩誤事以

重罪戾臣先准撫臣帖內要以小米三倍易大米一倍以濟本色蓋撫臣目擊小邦情事有此分付該管陪臣方依此貿換以圖接濟今者重兵旣已添留支剩米豆又充月餉則小邦更無可爲之地况義州等倉所儲豆子居半行使不便兼又散在各處轉輸實難抑恐軍情亦多不願以彼以此俱有所妨伏念天朝爲小邦動天下兵發天下財終始拯濟罔有限節此實簡策所未有至於助餉數月以完結局特其經紀之緒餘耳小邦衰微日甚將不能保有洪恩至以些少之費再瀆天聽惶報墮越措身無地伏乞皇上矜憐小邦竭急

之情特令該部再議全給仍將義州等倉支剩米豆許
令照舊交支協濟本色不勝幸甚爲此謹具奏聞

留兵處餉事宜奏批亥

朝鮮國王臣姓諱謹奏爲欽遵 明旨謹議留兵處餉
事宜懇乞 聖明特垂矜察仍令該部全給一應折色
以畢拯濟 大恩事臣竊照小邦蒙 天朝拯救之力
得以恢復疆土莫安遺黎而見有軍丁脆弱尠少不足
以捍禦後患督撫二臣因此焦心盡慮議留善後官兵
數至累萬分布要害蓋對馬一歧五島平戶等島賊巢
與小邦釜山巨濟等處地方隔海相望風便則一兩日

可到而賊僧玄蘇賊將平義智平調信吉留住對馬等
島節遣打細倭子窺我虛實所據留兵多則賊必畏懼
留兵少則賊復生心此係小邦存亡之機督撫二臣既
爲拯救小邦而來其爲計不容不如此其多留防範實
小邦之幸也然而始議留兵之時臣只以一萬五千爲
請再議酌減之時又只以五千爲請俱因小邦見糧多
小而有此不得已之請也卽目 天朝終始軫念計出
萬全要於二萬數內再行抽撤量留精銳實數是則該
部深燭大計酌議停妥而亦小邦請減之意也臣與一
國臣民益增感激但照該部議內中國一應折色量助

三分之一竊查小邦用兵七年八道凋殘而全慶爲尤甚在在田土拋荒榛莽穀野蕪又今年夏秋旱風爲災凡有耕種去處禾稼枯槁應收稅糧幾何雖加搜括所得想必不多况折色銀子原非小邦所產雖自東征之後天朝運來之貨多行街市而客商人等旋即收買在小邦民間者不過萬分之一零星之數難以搜查抽取以供軍需該部所指督臣之欲舉全餉倚賴中國者蓋以此耳先年副總兵臣劉綎鎮守八營時分經略臣宋應昌令小邦供給川兵月銀伊時小邦猶有遺下貨物而川兵之數止有四千七百小邦先以天朝欽

賜銀兩及運來布貨并小邦魚肉鹽醬等物相兼支放猶且不敷數月之內所儲罄竭仍備由咨會宋應昌應昌目擊小邦實情卽還用天朝折色照舊支給此是已試之驗也况今貨物匱乏甚於先年銀子布貨魚肉鹽醬俱無四五千兵二三月之支此是各營將官軍丁人等所共知也所賴以濟餉者只天朝遺下米豆并各道新熟之穀而今年凶歉如此新穀又不可望也前項折色若不蒙全給雖助三分之一小邦決無措辦之路到此地頭臣亦不知爲計必須該部仰體皇上矜恤至意照舊全給可以有濟臣蒙被聖恩得有今日

而善後軍餉猶不能自備再瀆天聰致煩有司臣罪於是乎益重矣仍照本賊短於水戰而長於陸鬪在洋則易制上岸則難禦海路之防尤係喫緊如於二萬內精選水兵八千貞名仍用老成廉勇將臣統領分住釜山巨濟等處協同小邦軍兵防守海路仍將撤回官兵於遼陽地方駐劄聽調如有緊急聲息星馳赴援或防或勦庶保朝夕無事而本色則臣當嚴督臣民竭力措辦以圖接濟伏望聖明特垂矜察仍令該部限事竣間將一應折色照舊支給以畢拯濟大恩如此則小邦得以乘間修備以爲自強之計而督撫二臣焦心善

後之策亦不歸虛地矣臣無任震越祈懇之至爲此謹具奏聞

請留兵奏

庚子
春

朝鮮國王臣姓諱謹奏爲倭賊伺釁兜謀叵測大軍將撤人心危惧懇乞聖明曲垂矜念量留一枝水兵以畢善後事據兵曹狀啓本國被擄人各供稱賊首秀吉死後其子嗣立有稱家康者攝伊國事威暴如秀吉日夜練兵蓄糧等待天兵盡撤將要再犯本國臣等看得前項賊情極爲叵測日後之事委係可慮茲者聽得各營善後官兵定於本年四月內盡行撤回目下全慶

公海一帶水陸軍兵不滿萬數防備百分疎虞合無題
請水兵三千并乞全給折餉存亡所係不容少緩各等
因具啓據此臣爲照伊賊亮狂桀逆其志固不在小幸
而皇威遠暢天斃老賊今雖暫還巢窟狺然稔惡猶
夫其心也遺孽不殄繼纂逆緒協以十道之强悍濟以
家康之梟桀方且休兵蓄銳以爲再搶之圖其不敢唐
突者徒以天兵尚在耳海波無阻偵船相望日覘
王師去留以爲動兵遲速而今又撤送老弱名以刷還
婉辭求欵探試淺深或聲言乘秋進搶或期以明春大
舉其所以恐喝開闔益無不至今若偵知大營盡撤則

彼亦何憚而不逞其亮乎南邊沿海之民咸謂天兵
若撤賊必隨至鳥駭狼顧荷擔而立隄防控扼百無可
倚已事足徵景象可憂况賊之可憂非獨今日今秋之
憂甚於今日來歲之憂又甚於今秋日復一日歲復一
歲此賊未滅之前都是可憂之日天兵既不可長戍
於小邦小邦亦不可每藉於天朝以臣之國寧不欲
自爲圖耶惟是積敗之餘喘息纔定萬事瓦裂措設未
遑雖捨拾遺丁於瘡痍溝壑之中而凋殘寡弱不成部
伍士氣先怯不戰思潰須得王師協守鎮服使沿邊一
帶恃而無恐然後庶得數年無事生聚訓鍊以爲自強

之基矣然臣之只請三千不慮其少者非以三千之兵爲可以捍禦兇鋒也天威所及猶足以折奸謀於未動鎮軍情於將洩而小邦措糧之勢過此則難乎支繼也盡徹則國無所倚多留則糧不可繼小邦今日之勢誠可悲矣夫穀必生於地財必出於民而小邦土地瘠隘民丁尠少自經喪亂八路皆被兇焰千里無復人烟賊退之後雖或粗起農功而不能平歲百分之一緣畝之民力竭於轉輸荷鋤之輩盡編於行伍生穀之源既絕裕財之道無因公私交困中外俱病以此物力供億軍需支撑至於八年者只恃天朝米豆倚以交濟耳

非臣之力所能辦此今則罄竭之極已到十分地頭而天朝米豆亦已盡矣唯將一年稅入之數扣算留兵該放之數則三千兵本色之糧猶有不足而此則竭力拮据可以措辦是係臣晝夜商度反覆熟講者豈敢率爾陳達以重罪戾亦豈敢含糊隱忍致誤大事至於折色月銀則小邦尤無辦出之路不得不全藉於天朝蓋以銀子本非小邦所產平時市舖只用米布經變以來百物殘缺如綿紬人參係是進獻之物而亦不得照舊採辦致缺常貢徃年副總兵劉綻領兵屯守時分經略宋應昌欲採銀於小邦以助月餉分遣工匠廣加採訪

深山窮谷無處不到而銀宍不多卒未有得不得已全
發天朝斯固已試之驗今則比其時又益匱矣雖鑿
倒一國決難助其萬一臣何敢惜費而誣上抑臣於此
徊徨踧踖終有所不忍上聞者臣自遭禍敗以來八
年之間上以貽皇上宵旰之憂下以貽多官籌畫之
勞山東之民勞於轉輸徵發將領士卒勞於戰陣鋒鏑
以臣之故肝腦塗地者未知幾人臣非木石寧敢自安
每念至此有地靡容惟思粉身以謝天下而恩私未
答奏顛愈煩賊來而請援賊退而請守兵少則請增
糧盡則請繼有急心呼無願不遂不啻如弱子之仰乳

於慈母雖聖量洪私天覆海涵棄瑕滌垢曲垂矜憐
而臣子分義豈容如是每一封奏心腸震掉猶不知
止僭越尤極只緣今日事勢實係存亡大局若以煩瀆
爲嫌而不早明白開陳有若可以自爲者然他日誤事
復罹顛隕使八年拯濟之恩終歸於虛地則臣之罪
至此而爲尤大矣爲此冒昧終不能自己兢惶戰灼措
身無所伏願聖慈洞燭亮賊覬覦之形俯察小邦殘
匱之狀特令該部仍留水兵三千選一良將期以數年
統領鎮守其折色月餉並蒙照例全給則邊情自固有
虎豹在山之勢賊膽潛消絕鯨鯢出海之患小邦自強

之圖亦得藉此而有濟豈不幸甚爲此謹具奏聞

請詰命冕服奏

辛丑夏

朝鮮國王臣姓諱謹奏爲詰命冕服等件因亂淪失懇乞聖明勅下該部照例補賜以彰恩典事本年四月二十日臣據陪臣禮曹判書李廷龜等啓稱小邦不幸猝遇倭患典章儀物俱陷於賊天朝恩賜詰命冕服等件亦被淪失是乃皇上錫命之典藩服受命之章皆不可一日無者而頃緣國事方急未遑聞奏茲者幸賴天地父母之仁兌鋒戢退疆土已靖小邦無國而有國合無將此兩項事件具奏聖聰庶得再膺

維新之命永受安吉之服允愜事宜等因具啓據此臣竊念小邦世荷皇朝錫命忝備東藩先該隆慶元年臣先父恭憲王臣諱薨逝臣嗣承貴業及至隆慶二等年欽蒙穆宗莊皇帝勅賜臣及臣妻朴氏詰命冕服等件臣欽遵寵命罔敢或墜由臣不祚奄遭大亂播越草莽僅延綴旒恩錫之典亦莫之保跼天蹐地無以爲容臣之無似既不能謹守封疆以貽朝廷之憂又不能祇奉恩詰重辱君父之命誠無顏面復有申請而過蒙聖慈覆憐偏厚涵育成就生死肉骨得以再造迄至于今廟社已復邦域粗完惟是詰命冕

服等件實臣所受於皇朝而臨臣民者不可一日而缺此臣所以猥恃寵靈不避瀆濫爲之陳乞也臣謹查先該嘉靖三十六年府居失火臣先祖恭僖王臣諱妃尹氏及臣先伯父榮靖王臣諱妃朴氏誥命等俱被燒毀臣先父恭憲王臣諱委差陪臣李名珪等具實聞奏世宗肅皇帝仍命補賜前項誥命等件今次陳請亦應比照列聖及先皇帝欽賜事例如蒙聖恩俯愍微情勑下該部將該誥命冕服等件再行頒降使臣如新受賜保有天恩不勝幸甚謹具奏聞

陳賊情奏辭

丑

朝鮮國王臣姓諱謹奏爲賊情事據議政府領議政李恒福等議啓臣等竊查先該上年四月本賊投書禮曹婉辭求款本國將該賊書備咨經理撫院等衙門仍令禮曹備將不可擅許之意回書去後卽今本賊再次刷還人口更要通款書辭詐誕兼以恐喝其情所在灼然可知竊念本島接近我境貪我互市自前往來今之乞款似是實情今若拒之則勢必抵死寇抄永爲邊患我國積敗之餘隄防守禦之具未遑措設天兵已撤衆心危惧今因其請略許歸附容我籌練以爲他日復讎之舉似合權時之策而關係賊情處置本國理難擅便

合無將該賊書辭緣備奏 天朝聽候處分等因具啓
據此臣竊照倭奴邀在重溟之外匪命于朝自相君長
實天地間化外之一種小邦不幸與之爲隣東南沿海
之地歲被侵掠之患隄防瞭察之備未嘗少懈而窟穴
儉遠風濤出沒動靜聲息無從訥知對馬一島最近我
境一水相望朝發夕至而本處土地磽瘠民無財產必
互市我邊以資生活小邦亦以地近勢逼有難終絕視
如蛇虺不與相較許其關市以防侵噬其所以羈縻撫
戢防釁弭禍者其來蓋久及秀吉篡立陰懷異圖貽書
悖逆脅以假途臣據義斥絕具奏馳 聞遂爲所仇罹

此喪敗臣之喪敗有不暇念而此賊射天之謀退思至
今魂悸自恨力綿勢弱不能蕩滅巢窟以快窮天之痛
幸而 聖武遠暢神威赫臨七年屯據之賊一朝捲甲
而逃茲蓋千載之偉烈曠世之盛舉天道禍惡老賊自
斃逋誅餘孽尚憚天威上年致書求好歸罪清正臣已
令嚴辭斥送而今又刷還人口再輸乞款之書是固聖
朝餘威之所及彼果何有於小邦也仍念乍和乍叛此
賊之本態方其對壘之際求款亦非一再臣雖朝夕阽
危而忍死不許者蓋堂堂大兵方討此賊在小邦唯欲
憑仗 皇靈一舉殲盡以申區區之義而已至於今日

則事機與前有異賊已回巢既失進勦之期王師盡旋
又無倚仗之勢而馬島迫在門庭永爲邊疆切近之灾
日後之憂殆無已時而茲者喘息纔定賊使遠至臣欲
許之則不忍初心之便乖臣欲不許則却慮後患之難
了臣於是時彷徨靡定不知所處事當量力謀貴審勢
昔勾踐棲於會稽以圖復讐而必須十年生聚十年教
訓始收沼吳之績蓋其量力審勢不得不如此也小邦
以瘡痍灰燼之餘萬事瓦裂兵糧器械措設未遑人心
危懼荷擔而立倘遇賊兵之再搶則鋒刃餘氓惄於傷
弓土崩波潰有難收拾誠恐區區薪膽之志卒無所施

而致寇失職重獲罪戾於天朝也况今來欵者皆是
近島之倭從前貪我關市受我約束如非欵我以仰哺
則勢必掠我以爲食犬豕之心反覆靡常異時之變動
雖難預測溪壑之慘唯利是趨今日之要求或是實情
今因其來姑許羈縻一以緩其禍一以試其情似是伐
謀之計而實出於無策非臣之本意臣臨局茫然昧於
遠圖反覆籌度不能自決况上有父母臣何敢一毫
擅越伏念天朝矜憫小邦不能自爲事無大小悉許
經紀矧今一事係是善後大機關爲此冒昧仰稟指
揮凟擾之罪實無所逃伏願聖慈俯察小邦事勢並

燭此賊情形特賜明降裁處以畢拯濟不勝幸甚爲此謹具奏聞

貢獻入參乞用把參奏

庚戌

朝鮮國王臣姓諱謹奏爲進獻事據戶曹判書黃慎等狀啓節該本國年例貢獻入參常用生參乍經霪濕則浥爛味變不適藥用千里貢路經時乃達雖十襲包裹常有透濕損傷之慮竊聞天朝之人專用把參不用生參其必以此也我國之人初不解把造之法頃於東征大軍出來時分學得於參商今則參戶商家如法把造比比行用天朝之人見而稱賞生參之易變既如

彼天朝之所尚又如此合無備奏天朝將把造之參以充貢獻允爲兩便等因具啓據此臣竊照小邦介在山谷之間號稱產參之地自來歲有恒貢從前不解把造之法唯擇生參以備筐篚之獻而生參不能耐久性味易變貢路遙遠多經潦暑雖十襲包護未免透濕今則既解其法把造行用天朝藥用用此而不用彼竊念享上之物原爲實用苟不適用不宜封進伏望聖慈勅下該部小邦歲貢人參許令以把參代獻則庶小邦不失壤奠之禮而天朝亦有實用之益緣係進獻事理爲此謹具奏聞

請世子冕服奏

庚戌

朝鮮國王臣姓諱謹奏爲乞賜世嫡冕服事據禮曹狀
啓節該王世子蒙 天朝欽降冊典已正名位而該用
冕服未有頒賜臣等竊查景泰元年莊憲王奏請世子
冕服 皇帝卽命賜之以七章冕服厥後本國遵據規
制相傳世守今旣淪失於兵火之中冕服式樣無從諳
委而茲者未蒙 頒賜必以景泰欽賜之制爲可以遵
做自製也 天朝若悉此等曲折則必不斬一副冠服
以慰羣情仍念先王誥命冕服因亂蕩失萬曆二十九
年先王差賀節陪臣趙挺據實具奏 皇朝卽許補賜

順付趙挺之回合無備將前因奏請 天朝將王世子
冕服照例補賜允爲便益等因具啓據此臣竊念小邦
襲封殷師謹遵聲教雖在要荒之陬素稱禮義之邦衣
冠之制竊慕中華遠邇 聖朝視同內服錫命之典世
荷隆眷臣旣濫膺 寵命纘承先緒臣之竭息亦蒙洪
造亟賜冊典數年之間 恩錫稠沓臣常感激刻骨銘
心敢有何望復煩 天聽乎第念天命五服所以定名
而章別旣有其名則當有其服今臣世子某旣得荐荷
鴻恩光膺顯冊正名定位爲國儲貳而所有章服未蒙
頒賜竊計 天朝必以爲景泰元年已有欽賜之制小

邦自可遵奉行用也唯是小邦不幸酷被兵燹國中儀物淪失殆盡七章規制無從譖委既未蒙新賜又未識舊制雖欲模倣圖式自爲創造而終是苟且不成真樣區區之念非但爲賤子榮耀於一時却恐皇朝七章之制至今日廢絕而無傳也仍竊伏念先臣昭敬王詰命冕服遭亂喪失因賀節陪臣據實具奏獲蒙聖明快許補賜順付陪臣之回恩例在邇昭可考也伏願聖明叅商小邦情事比照前後典例勅下該部亟許補賜俾微臣父子衣被寵光而舉國臣民畢覩盛典不勝幸甚緣係乞賜世嫡冕服事理爲此謹具奏聞

陳慰奏

辛酉

朝鮮國王臣姓諱謹奏爲亮賊陷據遼陽小邦朝聘阻絕敢以一介泛使仰申問慰之禮乞下該部指授貢路便宜以全侯度事本年三月二十八日據義州節制使鄭遵馳報本月十三日奴賊大勢兵進陷瀋陽十九日犯遼陽二十日闖入遼城尚今屯結等因又據本國回报還進香陪臣李必榮陳慰陪臣朴彞叙迎逢團練使尹孝幹報稱遼陽東八站道路阻絕不得前進進香使臣等前月二十八日離了北京想於十九日間當到遼東存沒下落無由得聞又據鄭遵馳報鎮江越邊居民自

二十三日扶携老幼繩屬出來此邊蘭替等島留宿鎮江衙門寂然人民潰散遊擊獨坐唏噓但云二十日遼城失守逃散軍兵避亂男婦席捲出來俺身在此固知所爲等因又據贊畫使李時發平安道節度使禹致績等馳報胡監軍自寬奠乘船要向海蓋以圖防守寬民或上山避亂而二十二日奴兵四騎馳到本鎮號令軍民曰欲死則死欲降則降寬民旋皆納降又據鄭遵馳啓袁經略差官陳一敬曾因經略分付要買銅鍋前往王京回到本府初欲陪天使乘船回去及見其子與婿自遼東迎到江上聞其所言氣色便異卽欲由徑路

走達海州衛棄置銅鍋過江去了再三挽留終不聽從其情委難測知等因又據贊畫使李時發等馳啓奴酋入據遼城李永芳勸賊立國遼城邸撥持黃旗出來一竿上書天命皇帝一竿書鎮江官民歸服事云又據鄭遵馳報四月二十三日小譯金彥希等探聽回來說稱鳳凰城路中望見騎軍十七名從西出來耕田農人羣起齊謁俺等潛伏草間其行既遠問於農人曰彼去者爲誰而若等釋耒投拜乎答稱是卽永芳所差鎮江新中軍劉姓人何得無禮仍耕作如常云又張小山者說稱永芳僞差遼東人李成爵爲鎮江守堡官二十三日

夕時已到本鎮鎮江把總吳仲庫卽爲降附又鳳凰住
民丁朝月者自作健子摸樣嘯聚光棍數百人劫掠閩
里橫行作賊鎮江無賴之輩亦多投入此輩衆多則恐
有引賊來犯之患云云以此觀之則一江西岸變作犒
裘之域此後本國哨後勢難過江遠探脫有兇賊舉兵
來犯則鋒到城下方可得知孤絕之勢日懸一日添兵
運餉等事急速議處等因據此行間據議政府狀啓遼
城失守賊鋒甚熾鴨綠西邊盡爲波蕩兒賊豕突之患
次將及我義州孤城朝夕可虞沿江防守一刻爲懸除
申飭各該將領另嚴隄備外遼廣一路消息邈然 父

母之國遭此無前之辱臣子今義禮當慰問且朝京之
路今已阻絕回還及入去進香陳慰兩起使臣俱皆在
道阻梗生死莫知且 登極進賀詔勅陳謝聖節冬至
等使次第當發而遼路如此末由前進漸至稽遲委屬
惶悶 詔使之還今當乘船駕海而本國朝聘之路則
必須先爲奏請奉有 明旨方可遵行合無另差一介
跟同 詔使泛海前往奉 奏陳慰仍請指揮貢路其
上年 賜銀辨誣降勅陳謝陪臣則奉表登途聞變路
梗久滯境上并與陳慰陪臣一時偕往允爲便益等因
具啓據此臣竊照蕞爾小醜實化外之一種始焉負嵎

呻吟吞噬諸屯終乃跳梁自大建設僞號兇狂之極乃
敢稱兵射天罪惡已盈猖獗彌甚神人之所共怒天地
之所共誅小邦禍患燃眉義不共戴已未三路之役僅
以數萬之兵仰助協討之舉帥臣偷生全軍淪陷未張
撻伐之威難免僨事之罪追思至今膽聳如山伊賊信
然旁伺仇怨益甚小邦力綿勢孤無以自保西北數千
里之境吏薄食兵坐甲朝夕待警四年于茲矣唯是
皇威遠暢天下震動飛輶載途水陸齊舉蕩掃之期指
日以待而奈何窮寇決死肆毒未已天不悔禍王師
失利旬日之間兇鋒大熾或言奴酋入據遼城搬移妻

子或言永芳占駐衙門收聚玉帛或言袁經略入保千
山或言城中大官罵賊而死或言奴賊送旗招誘寬鎮
軍民稍稍降附或言僞署賊將已據鎮江或言賊兵分
掠海州三義以東兇焰已遍不惟賊兵四出搶殺在處
光棍假作撻擥辯髮持兵劫掠村民因北道路阻隔人
烟斷絕哨探無憑奔竄日甚臣每接一報心腸震掉驚
惶憂憤不能自安仍念此賊梟狂桀逆勢已滔天其視
小邦特是一巒自富車之役移怒於小邦磨牙鼓吻欲
一甘心久矣而猶不敢遽爲下手者徒以有遼陽爲之
聲援耳彼果何有於小邦哉今者遼城旣爲賊窟已失

憑仗之勢八站又爲亂民已梗往來之路小邦有難誰救有惡誰憇何恃而圖存何倚而禦賊譬如赤子垂死又絕慈母之乳又如中流船敗更失篙師之濟遑遑悶迫之情欲陳哽塞小邦存亡雖不足言而念及天下之事益復摧心塞上數十萬之精銳盡爲蟲沙城中三百年之積貯盡爲灰燼堂堂天朝以四海九州之廣雖失數城不足爲輕重大衆更舉桑榆非晚送死殘孽終當就戮而目下喪敗之慘實近年所未有之變竊想閩輔震驚上軫宸衷區區遠臣封疆有守既未能親率戎行除羌雪耻又未能百舍重趼西赴國難敢以一

介行李浮海前徃恭申問慰之禮兼陳小邦孤危悶蹙之狀以冀聖明哀憐垂察焉仍照小邦朝聘之路必由遼東討出都司勘合驗票及護送文引方可得達而壬辰兵亂之後小邦仰如父母天朝視同內服有事必稟有呼必應節賀例行之外冠蓋絡繹往來無阻卽今羌賊方據遼城陸路已阻通行不可易其海路有禁須經奉有明旨伏乞令下該部許令泛海通貢卸泊處所及經由驛遞並命指揮施行爲此謹具奏聞

月沙先生集卷之二十二

月沙先生集

四十一

